

東
華
續
錄

東華續錄

光緒一百四十五

臣朱壽朋敬編

臣潘鴻鼎恭校

五月癸丑朔諭軍機大臣等戶部兵部會奏遵議御史曾宗彥奏請精練陸軍改為洋操並將各省兵數
餉數開單呈覽一摺今日時勢練兵為第一大政練洋操尤為練兵第一要著惟須選教習以勤訓練核
餉力以籌軍實現在天津新建陸軍江南自強軍均係學習洋操北省勇隊著由新建陸軍酌撥營哨之
學成者分往教練南省則由自強軍酌撥營規口號均須一律各直省將軍督撫統限六箇月內將併餉
練隊及分紮處所妥議覆奏至軍械鎗礮應飭各省機器局酌定快鎗快礮格式鎗子彈分量造法互相
討論折衷一是如式製造精益求精以期利用並著一體妥速籌辦毋得宕延餘依議原摺均著鈔給閱
看將此通諭知之○諭依克唐阿等奏馬賊焚劫集鎮並燬衙署請將疏防各官分別懲處一摺本年四
月間有馬賊二百餘名闖入喇陽鎮沿途燒搶該總管等既未能先事預防又未能探明賊蹤立時搜捕
實屬畏葸無能咎無可諉海龍城總管依桑阿著革職留營効力以觀後效左翼翼長侯禮協領舉格著
卽行革職海城縣知縣謝海龍驅通判楊澍著交部議處仍著依克唐阿等嚴飭派出各營隊實力搜拿

將此股賊匪悉數撲滅毋任蔓延爲患○甲寅 上詣 大高殿祈雨○飭四川布政使王之春速赴新任○諭御史曾宗彥奏農工二務亟宜振興一摺另片奏南北洋宜設立礦學學堂等語著總理各國事務衙門一併議奏○宋伯魯等奏 臣伏讀四月二十三日 上諭仰見 皇上赫然發奮圖新自強而尤垂意於學校外交兩事此誠儲才之急務保邦之遠猷也 臣維禮部爲學校總匯之區總署乃外交鈐鍵之地必得人以爲理始措置之得宜竊見禮部尙書總理各國事務大臣許應駘品行平常識見庸謬妄自尊大剛愎陵人禮部爲文學之官關係極爲重大 國家學校貢舉之制多由核議 皇上既深維窮變通久之義爲鼓舞人才起見特開經濟特科歲舉兩途以廣登進而許應駘庸妄狂悖腹誹 朝旨在禮部堂上倡言經濟科之無益務欲裁減其額使得之極難就之者寡然後其心始快此外見有 詔書關乎開新下禮部議者其多方阻撓亦大率類是接見門生後輩輒痛詆西學遇有通達時務之士則疾之如讐 皇上日患經濟之才少而思所以養之許應駘日患經濟之才多而思所以遏之 臣不解其何心也總理衙門爲交涉要區一話一言動易招衅非深通洋務洞悉敵情豈能勝任許應駘於中國學問尙未能十分講求何論西學而獨鄙夷一切妄自尊大其於傷邦交而損 國體所關非細故也 臣以爲許應駘既深惡洋務使之承乏總署於交涉事件一毫無所贊益而語言舉動隨在可以貽誤宜令卽行

退出總理衙門實爲慎重邦交之道禮部總持天下學術 皇上方醇醇誠諭令天下講求時務以救空
疏迂謬之弊則乎其間日以窒塞風氣禁抑人才爲事致 聖意不能宣達天下無所適從宜解去部職
以爲守舊設國者戒伏請 皇上天威特振可否將禮部尙書許應駟以三四品京堂降調退去總理衙
門行走庶幾內可以去新政之癰蔽外可以免鄰封之笑柄所係似非淺鮮 上諭御史朱伯魯楊深秀
奏禮部守舊迂謬阻撓新政一摺著許應駟按照所參各節明白回奏○乙卯夏至大祀 地於 方澤
上親詣行禮○丙辰 上幸頤和園詣 慈福端佑康頤昭豫莊誠壽恭欽獻崇熙皇太后前請安駐
蹕○授榮祿爲文淵閣大學士○予故正藍旗蒙古都統和碩額駙扎拉豐阿祭葬○許應駟奏本月初
二日內閣奉 上諭御史朱伯魯楊深秀奏禮部守舊迂謬阻撓新政一摺著許應駟按照所參各節明
白回奏欽此並軍機處鈔錄原奏交出到 臣俯思懇直之招尤仰荷 聖明之洞察許自陳遠良深感悚
謹將被參各節爲 皇上縷晰陳之如原奏謂 臣腹誹 朝旨有在禮部倡言經濟科無益務使裁減其額
使得之極難就之者寡一節查嚴修請設經濟科一摺係下總署核議 臣與李鴻章等以其因延攬人材
轉移風氣起見當經議准覆陳若 臣意見參差可不隨同畫稿何至 朝旨既下忽生腹誹夫誹存於腹
該御史奚從知之任意捏造已可概見至旋舉中額應由 臣部妥議會同具奏恭候 欽定 臣維事關創

始當求詳慎自古名臣著論斤斤以珍惜名器爲要闕况鄉舉一階膠庠所重倘過爲寬取恐濫竽充選
鄙夫之所爲卽志士之所羞人才何由鼓勵是以與同部諸臣熟商定額期於協中既不敢存刻核之見
以從苛更不敢博寬大之名以要譽且現未定稿該御史竟謂臣務欲裁減不知何據而臣向來交議事
件未經覆奏以前言官不得攙越條奏今該御史驟挾成見逞臆速陳殊非體例原奏又稱 詔書關乎
開新下禮部議者臣率多方阻撓一節近來迭奉 明諭如汰冗兵改武科諸政事均不隸臣部豈能越
俎代謀此外惟楊深秀濫正文體一摺係奉 旨交議按之西學時務無甚關涉且未擬稿何得云多方
阻撓耶原奏又稱臣接見門生後輩輒痛詆西學遇有通達時務之士則疾之如讎一節竊臣世居粵嶠
洋務夙所習聞數十年講求西法物色通才如熟習洋務之華廷春精練鎗隊之方耀喜製火器之賴長
均經先後奏保及東軍事起三員並舉調謝未展其才臣深惜之方今時事多艱需才愈亟凡有偏長片
技堪資實用者斷不肯失之交臂卽平日接見門生後輩無不虛衷諮訪冀有所益並勗以務求實際
無尙虛華初何嘗痛詆西學該御史謂臣離視通達時務之士似指工部主事康有爲而言康有爲與臣
同鄉稔知其少卽無行追通籍旋里屢次搆訟爲衆論所不容始行督京意圖倖進終日聯絡臺諫夤緣
要津託詞西學以聳聽觀卽臣寓所已干謁再三臣鄙其爲人概予謝絕嗣在臣省會館私行立會聚衆

至三百餘人臣恐其滋事復爲禁止此臣修怨於康有爲之所由來也此者 飭令入對卽以大用自負向鄉人揚言及奉 旨充總理衙門章京不無失望臣在總署有堂屬之分而思中傷捏造浮辭諷言官彈劾勢所不免前協辦大學士李鴻藻嘗論今之以西學自炫者絕無心得不過藉端牟利借徑名臣素服膺其論今康有爲逞厥橫議廣通聲氣與西報之陳說輕 中朝之典章其建言既不可行其居心尤不可測若非罷斥驅逐回籍將久居總署必則探機密漏言生事長住京邸必勾結朋黨快意排擠搖惑人心混淆國事關繫非淺臣疾惡如讎誠有如該御史所言者原奏又稱臣深惡洋務一節臣自承乏總署已逾一載平日仰蒙 召對輒以商務曠務製船製械等事皆屬當務之急屢陳 天聽請次第施行臣是否塞風氣應亦難逃 聖鑒竊自膠事定議後總署交涉事件益難措手倘徒事以口舌斷不能弭讎患臣望淺才庸自揣萬難勝任惟有仰懇 天恩開去總署差使俾得還鄉而免隕越實爲厚幸

上諭許應駘奏遵旨明白回奏一摺該尚書被參各節既據逐一陳明並無阻撓等情卽著毋庸置議禮部有總司選舉學校之責總理衙門辦理交涉事件均關緊要該尚書嗣後進事務當益加勉勵與各堂官和衷商榷毋負委任○丁巳以吏部尚書孫家鼐爲協辦大學士○以王文韶爲戶部尚書○命王文韶在軍機大臣上行走○命王文韶在總理各國事務衙門行走○實授榮祿爲直隸總督兼充辦理

通商事務北洋大臣○以延茂爲吉林將軍○以崇禮爲步軍統領○諭我朝承宋明舊制以四書文取士康熙年間曾經停止八股改試策論未久旋復制藝一時文運昌明儒生稽古窮經頗能推究本原發明義理制科所得不乏通經致用之才乃近來風氣日漓文體日敝所試時藝大都隨題敷衍於經義罕有發明而謾陋空疏者每種濫竽充選若不因時變通何以見實學而拔真才蓋自下科爲始鄉會試及生童歲科各試向用四書文者一律改試策論其如何分場命題攷試一切詳細章程該部卽妥議具奏此次特降諭旨實因時文積弊太深不得不隨時改變以破拘墟之習至士子爲學自當以四子六經爲根柢策論與制藝殊流同源仍不外通經史以達時務總期體用兼備人皆勉爲通儒毋得競逞博涉徒蹈空言致負朝廷破格求材之至意○戊午以曾廣漢爲右副都御史○陶模奏應准兵部咨會議榮祿高燾曾等請設武備特科並黃槐森改試洋鎗各節備錄兩次議覆奏稿行令各省熟察情形各抒所見陸續奏咨等因前來竊維武科改制係爲造就人才起見創法之始必須預防流弊審慎出之部咨所謂彙集衆長極衡一是洵切當之論也原奏至爲周詳惟取中武生始挑入學堂及武童仍由學政考試不先以水陸分科又准令武童在家自行操演等情再三詳酌似宜據爲變通查西人選兵之制既建武備學堂以儲心腹干城之用必先由文法學堂學習習數考有文憑方能與於此選故西國之兵無一人

不知審其將領尤才識過人熟嫻船略我之大弊在文武分途無論甲科行伍大都目不識丁專請幕友弊端百出今議改制而童試之初不問讀書識字與否祇重鎗礮游勇匪徒皆得徼倖於一試其弊當更有甚於未改制之先者進身之始既未能正本清源俟取中武生後方令入學堂肄習格致地輿兵法諸學是猶未經學步而欲其馳也臣以爲宜仿西人文法學堂之意民間子弟願應武試者報由州縣官查明身家清白質性馴良者先行局試必須文理粗通方許送入學堂作爲學生則初基端正庶免莠民混入此原奏之宜變通者一也時局益艱日後文試亦將更張勢必倍難於舊制如武試仍由學臣考試恐才力不能兼顧既設學堂所有總分教習等員學問較爲專習今我議改法但統言之曰武生不分別水陸兩途是祇以鎗礮弋取衣頂上與下皆不知儲爲何軍之材所取安能適用臣竊以爲水軍陸軍當於童時分途肄習沿江沿海諸省兼設水師學堂其水軍學生由華洋教習督練天度海道御風布陣魚雷汽機諸法固若干年奏派提鎮大員會同洋教習駕駛練船游歷外洋親試各生所學專門之技是否純熟詳記分數復由本省督撫試以水軍兵法各論亦詳記分數總核兩次分數並優者作爲水軍秀才咨送辦理水軍大臣再加考試擇其優者爲水軍舉人其陸軍學生入武備學堂由教習督練馬步鎗礮整散起伏測算遙擊溝壘工程繪圖治械各事若干年奏派司道會同教習分場校試技藝詳記分數復由

得撫試以陸軍兵法各論亦詳記分數總核內外場分數並優者作爲陸軍秀才咨送兵部或南北洋大臣再加考試擇其尤者爲陸軍舉人仍 欽派王大臣覆核水軍陸軍各舉人擇最優者作爲進士習之專擇之精待之榮庶可得濟時之彥此原奏之宜變通者二也西人弁兵之所以精強不僅在明於鎗礮而在明於兵法輿地各國水陸軍制及創械用械之理非久居講習必不能表裏貫通原奏章程准武童在家自行操演未經挑入學堂之武生亦准令回籍自行學習黃槐森又奏稱由士子自買洋鎗如此係任令癘悍之徒幽莽從事既無中西名師益友之指授又無各國新書奇器之觀摩所能勉強習用者惟鎗彈一事從此假公濟私漫無限制雖於鎗桿刻名姓比鄰具結州縣存案徒增離擾而已況在上者惟求應試人多在下者人人託名習武隱濟其奸號稱改變武科於西國普法未得皮毛轉致家家購置火器先招變法之禍臣以爲生童在家操演及自買鎗礮二事斷不可行習武者必令入學堂所用鎗礮必由教習委員經理非有學堂不得私蓄此原奏之宜變通者三也抑臣更有說者只談變法不脫去舊日科目便多窒礙今仍拘執舊章欲處處有武童武生應試以飾觀瞻不得不令自買鎗礮在家操演委曲遷就誠屬無可如何之事然值時艱更章一切祇期足用不必貪多期於得真材不必假名器以爲悅人之具竊意內而畿輔外而沿邊險路必瀕臨江海各省建造武備水師學堂秀才舉人選於斯參遊都守

取於斯果有十餘省得力之學堂儘足備二十餘省之用創辦伊始不妨暫停一二科從容學習將來中
選者卽令得官免其贈賂改節若泥定各省原有中額絀於財力不能盡設學堂則有自行操演之弊縱
能盡設學堂而倉猝舉行難得良師教習終歸有名無實此宜核實酌辦無事與前例以徇俗情者也至
增日武生武舉應准投營効力量才錄用無論新章能否通行舊例武科應一律停止以歸畫一得旨
著總理各國事務衙門會同兵部妥速議奏○已未以凱奏爲正白旗漢軍都統載勛爲正藍旗蒙古都
統○諭前因蘆漢開辦鐵路設立招商公司特派盛宣懷督辦計時將及兩年所有勘路購地各事應辦
有端緒此項鐵路關係緊要豈容觀望遲延現在業已籌有的款著盛宣懷週日興工程辦並將辦理情
形先行具奏倘再延不開辦玩誤要工責有攸歸盛宣懷豈能當此重咎耶此外粵漢甯滙各路著承辦
各員一體迅速開辦毋得任意遲緩○辛酉 上還宮○諭茲當整飭庶務之際部院各衙門承辦事件
黃戒因循前因京師大學堂爲各行省之倡特降諭旨令軍機大臣總理各國事務王大臣會同議奏卽
著迅速覆奏毋再遲延其各部院衙門於奉旨交議事件務當督飭司員週期議覆倘再仍前玩愒並不
依限覆奏定卽從嚴懲處不貸○諭前據順天府尹胡瑞榮奏請精練陸軍並神機營改用新法操演
又出使大臣伍廷芳奏京營綠營參用西法各摺片當經先後諭令軍機大臣會同督辦軍務王大臣及

神機營王大臣八旗都統妥議具奏現在督辦軍務處業已裁撤所有諭令覆議各節卽著軍機大臣會同神機營王大臣八旗都統迅速議奏毋得延緩○壬戌總理各國事務衙門奏光緒二十四年四月十三日奉軍機處鈔交御史楊深秀奏泰西學校專以開新爲義政治學術理財練兵農工商礦一切技藝日出精新皆有專門之書自交涉以來同光以前議臣亦未嘗言變法而其所見率皆在築礮臺購兵艦買鎗礮練洋操而已尙未知請求學校也當今直省督撫亦紛紛漸知立學堂矣然學堂以何物教之尙未計及也言學堂而不言譯書亦無從收變法之效也同治時大學士曾國藩先識遠見開製造局首譯西書而奉行者不通原本徒譯兵學醫學之書而政治經濟之本仍不得一二以是變法終不得其法也攷日本之變法也盡譯泰西精要之書且其文字與我同但文法稍有顛倒學之數月而可大通人人可爲譯書之用矣若少提數萬金以舉譯書之事而盡智我民其費至簡其事至微其效至速其功至大未有過於此者請 飭下總理各國事務衙門議行或年撥數萬金試辦等因奉 旨著總理各國事務衙門議奏欽此又於光緒二十四年四月十九日准軍機處鈔交御史李盛鐸奏時務需才請開館譯書以宏造就乾隆年間開四庫全書館西土譯著之書悉予著錄今者梯航鱗集文軌四通政俗既同歸而殊途學藝復日新而月異論外交非洞明公法律例無以爲應變之方肄武備非講求格致製造無以爲制

勝之具冒理財非攷究農工商礦無以探養民富國之原查譯書事務日本自明治維新以來所譯之書極多由東譯華較譯自西文尤爲便捷應請 飭下出使大臣飭查日本所譯西書全數購寄以便譯印至江南製造局譯書一事仍飭查照成案辦理如蒙 俞允所有譯書館事務應否 特派大臣管理抑或由管理官書局大臣兼辦等因奉 旨該衙門議奏欽此 臣等查該御史等所稱籌款開館編譯西書以開民智而造人才自係當務之急亟應及時開辦以開風氣之先且令京外各學堂有所肄習至原奏所稱譯書館事務應否 特派大臣管理抑或由管理官書局大臣兼辦一節係爲鄭重起見惟是譯書一事與設立學堂互相表裏全在總理得人不繫官職之大小況所譯書籍既購自外洋則擇地開館尤宜審慎周詳庶經費不至虛擲茲查有廣東舉人梁啟超究心西學在上海集資設立譯書局先譯東文規模已具而經費未充殊非經久之道上海爲華洋總匯所購外洋書籍甚爲利便刷印工本亦較相宜該舉人經理譯書事務可收事半功倍之效 臣等公同酌議每月擬撥給該局譯書經費銀二千兩卽將該局改爲譯書官局官督商辦倘經費仍有不敷准由該局招集股份以竟其成所譯之書應先儘各國政治法律史傳諸門觀其治亂興衰之故沿革得失之迹俾可參觀互證以決從違徐及兵制醫學農礦工商天文地質聲光化電等項以收實用譯成一種揭以提要卽寄 臣衙門以備敬呈 御覽並令分送

各省新設之學堂學會藏書樓各一分以資攷究其餘准該局出售俟開辦數年之後譯出之書漸多售
費之值可敷局中推廣之用當即停撥官款以節經費如蒙 俞允即由 臣衙門知照南洋大臣暨札行
江海關道就在出使經費項下按月撥給該局譯書經費銀二千兩並札飭該局員將開辦日期妥擬詳
細章程呈送 臣衙門核定立案至江南製造局譯書一事仍應查照成案認真辦理毋令廢弛得 旨如
所議行○癸亥諭給事中高燮曾奏成都將軍恭壽著理總督與為將軍時聲名測異請嚴旨申飭等語
言官職在糾參自應指明款跡據實臚陳該給事中既稱恭壽貪劣顯著吏治廢弛物議沸騰當有實跡
可指著高燮曾迅速明白回奏○甲子以京師得雨 上詣 大高殿報謝○宋伯魯奏本月初五日奉
上諭因時文積弊太深不得不改絃更張以破拘墟之習總期體用兼備人皆勉為通儒等因欽此臣
伏讀之下仰見 皇上天錫智勇洞悉積弊之原力破迂拘之格千年沉痾一旦掃除轉弱為強在此一
舉矣臣又讀本年正月初七日 上諭有創行經濟歲舉在各省學堂挑選高等學生應攷作為經濟科
舉人貢士等語臣恭繹前後 兩諭用意實同特前者因入股取士相沿既久未便遽革故別創一格以
待實學之士今既毅然廓清積弊改試策論則與經濟歲舉所試各項大略從同似宜合於一途以一觀
聽臣竊維中國人才衰弱之由皆緣中西兩學不能會通之故故由科舉出身者於西學輒無所聞知由

學堂出身者於中學亦茫然不解夫中學體也西學用也無體不立無用不行二者相需缺一不可不可今世之學者非偏於此卽偏於彼徒相水火難成通才推原其故始由取士之法歧而二之也臣以爲未有不通經史而可以言經濟者亦未有不達時務而可謂之正學者教之之法旣無偏畸取之之方卽當無異致似宜將正科與經濟歲科合并爲一皆試策論則試以經義附以掌故策則試以時務兼及專門泯中西之界限化新舊之門戶庶體用並舉人多通才且并兩科爲一科省卻無數糜費不然則歲歲舉行鄉會試國家財賦斷不能支如蒙 採擇乞將臣所陳交部一並議覆抑臣更有請者新政之行當如風行草偃惟期速成恭摺 諭旨改試策論自下科爲始臣竊思鄉會兩場試事纒竣自不能不待諸下科若生童歲科現在隨時按攷既定例下科始改則現時自仍用舊章彼生童若不習入股則無以爲應攷之地若仍習之則明明爲已廢之制灼然知其無益兩年之後卽行廢置又何必率天下之生童枉費此兩年之力以從事於此是令天下無所適從也臣以爲應試之人莫多於生童故轉移風氣必當自生童始既奉 明詔變法以厲實學必使士子用心有所專注庶學問不致兩歧伏乞再行明降 諭旨除鄉會試自下科爲始改試策論外其生童歲科試卽飭各省學政隨按臨所至一經奉到 諭旨立即遵照章程一律改試經史時務兩者並重庶學者不以帖括分心得以專力講求實學至下科鄉會試之時

而才已不可勝用矣 上諭御史宋伯魯奏請將經濟歲舉歸併一科各省生童歲科試迅即改爲策論一摺前因八股時文積弊太深特諭令改試策論用覘實學惟是揆諸大典以鄉會兩試爲綱鄉會試既改策論經濟歲舉亦不外此自應并爲一科攷試以免紛歧至生童歲科試著各省學政奉到此次諭旨卽行一并改爲策論毋庸候至下屆更改將此通諭知之○乙丑總理各國事務衙門與英國使臣續辦樂訂中英釐租威海衛專條其文曰今議定中國政府將山東省之威海衛及附近之海面租與英國政府以爲英國在華北得有水師合宜之處並爲多能保護英商在北洋之貿易租期應按照俄國駐守旅順之期相同所租之地係劉公島並在威海灣之羣島及威海全灣沿岸以內之十英里地方以上所租之地專歸英國管轄以外在格林尼址東經一百二十一度四十分之東沿海暨附近地方均可擇地建築砲臺駐紮兵丁或另設應行防護之法又在該界內均可以公平價值擇用地點並開泉修築道路建設醫院以期適用以上界內所有中國管轄治理此地英國並不干預惟除中英兩國兵丁之外不准他國兵丁擅入又議定現在威海城內駐紮之中國官員仍可在城內各司其事惟不得與保衛租地之武備有所妨礙又議定所租與英國之水面中國兵船無論在局內局外仍可享用又議定在以上所提地方內不可將居民迫令遷移產業入官若應修建衙署築造砲臺等官工須用地段皆應從公給價此

約應俟書押之日起開辦施行其 批准文據應在英國京城速行互換爲此兩國大臣將此專條書押
蓋印以昭信守 此專條在中國京城繕立漢文四分英文四分共八分○丙寅 上幸頤和園請 慈
福端佑康頤昭豫莊誠壽恭欽獻崇熙皇太后前請安駐蹕○丁卯賞舉人梁啟超六品銜辦理譯書局
事務○總理各國事務衙門奏本年正月二十五日奉 上諭御史王鵬運奏請開辦京師大學堂等語
京師大學堂迭經臣工奏請准其建立現在亟須開辦其詳細章程著軍機大臣會同總理各國事務衙
門王大臣妥議具奏欽此 等以事關創始籌畫匪易當即查取東西洋各國學校制度暨各省學堂現
行章程參酌釐定倘未就緒旋於四月二十三日奉 上諭前因京師大學堂爲各行省之倡允宜首先
舉辦著軍機大臣總理各國事務衙門王大臣會同妥速議奏等因欽此 等往返商榷正在將章程妥
議具覆復於本月初八日奉 上諭前因京師大學堂爲各行省之倡特降諭旨令軍機大臣總理各國
事務王大臣會同議奏即著迅速復奏毋再遲延等因欽此 等跪誦之下悚懼莫名竊維今日中國亟
圖自強自必以育才興學爲要總考歐美各國富強之故實由於無人不學無事不學其學校每年所需
經費英至九百三十餘萬磅法至四百餘萬磅其餘諸國亦數百千萬不等以故負笈之士成就遠大政
治學術日異月新近人至以學校之多寡視國政之盛衰非無因也中國當更新之始京師爲首善之區

創茲鉅典必當規模宏遠條理詳備始足以隆觀聽而育人才臣等體仰 聖意廣集良法斟酌損益草
定章程規模略具舉其要義凡有四端一曰寬籌經費二曰宏建學舍三曰慎選管學大臣四曰簡派總
教習提綱挈領在此數者學堂養士數百購圖書備儀器需款甚鉅非有額撥常年專款斷難持久而現
在經費創始所費尤爲不貲臣等約計開辦經費需銀三十五萬兩常年經費一十八萬兩有奇其數似
已甚多然較諸西國尙不及十分之一 皇上垂注大學堂屢發 明詔作人之意至勤勸矣伏乞 飭
下戶部卽連籌撥專款俾得興辦所有常年經費亦預先指定庶免延誤將來如有推廣不敷支給再由
管學大臣臨時酌度請 旨辦理現在開辦經費內仰蒙 聖恩撥給官地亦可稍從節省然擬舍未具
尙須新築中等竊思時事日殷須才孔亟若從容築室又當遲以歲月查日本開學之先皆權假邸舍以
集生徒今事當速舉似可權宜伏乞 皇上撥給公中廣大房室一所暫充學舍命官選工勉日興辦其
大學堂仍應別撥公地另行構建則規範既宏而舉事不滯學舍具矣而任事需人大學堂設立京師以
爲各省表率事當開創一切制度均宜審度精詳非有明體達用之大臣以筦攝之不足以宏此遠模況
風氣漸開各省已設學堂近又興奉 諭旨停試八股講求西學各省向課制藝書院自應一律更改將
來學堂日有增益而無所統轄必至各分畛域其弊不可不防伏乞 皇上簡派大臣中之博通中外學

術者一員管理京師大學堂事務卽以節制各省所設之學堂其在堂辦事各員總由該大臣慎選奏派
命官既須鄭重而擇師尤關緊要今士人學無本原不通中國政教之故徒襲西學皮毛豈能供 國家
之用欲轉移之非精選總教習不可苟得其人學術正而道藝興苟失其人學術謬而道藝亦誤伏惟
皇上孜孜興學尤宜慎簡教習以收尊道敬學之效總教習綜司學堂功課非有學識中外之士不足以
膺斯重任非請 皇上破格錄用不足以得斯宏才若總教習得人分教習皆由其選派亦可收指臂之
助其餘一切擬辦事宜悉具章程之內謹繕清單恭呈 御覽 上諭軍機大臣會同總理各國事務衙
門王大臣奏遵旨籌辦京師大學堂並詳細章程繕單呈覽一摺京師大學堂爲各行省之倡必須規模
宏遠始足以隆觀聽而育英才現據該王大臣詳擬章程參倣泰西學堂綱舉目張已屬周備卽著照所
擬辦理派孫家鼐管理大學堂事務辦事各員由該大臣慎選奏派至總教習總司功課尤須選擇學識
中外之人奏請簡派其分教習各員亦一并精選中西並用所需興辦經費及常年款項著戶部分別詳
撥所有原設官書局及新設之譯書局均并入大學堂由管學大臣督率辦理此次設立大學堂爲廣育
英才講求時務起見該大臣務須督飭該教習等按照所定課程認真訓迪日起有功用副朝廷振興實
學至意○戊辰諭朕欽奉 慈禧端佑康頤昭豫莊誠壽恭欽獻崇熙皇太后懿旨榮祿現已補授直隸

總督所有昔陀哈萬年吉地工程仍舊榮祿會同奕劻辦理○諭建設大學堂工程事務著派慶親王奕劻禮部尚書許應麟迅速辦理○諭總理各國事務衙門奏議復御史曾宗彥奏請振興農學一摺農務爲富國根本亟宜振興各省可耕之土未盡地力者尙多著各督撫督飭各該地方官勸諭紳民兼採中西各法切實興辦不得空言搪塞須知講求農田種植之道全在地方官隨時維持保護實力奉行如果辦有成效准其擇尤奏請獎敘上海近日創設農學會頗開風氣著劉坤一查明該學會章程咨送總理衙門查核頒行其外洋農學諸書著各省學堂廣爲編譯以便肄習○張之洞奏准兵部咨開變通武科一摺並擬定大概章程十條光緒二十四年二月二十六日奉 上諭著照該大臣等所議鄉試自光緒二十六年庚子科爲始會試自光緒二十七年辛丑科爲始童試自下屆爲始一律改試鎗礮等因欽此又准兵部咨議覆廣西巡撫黃槐森奏武場改試洋鎗並攷取中式分別選用一摺令各督撫各就見聞所及詳細奏明並開列各項章程報部酌辦等因光緒二十四年三月二十八日具奏奏 旨依議欽此咨行到部仰見 皇上因時制宜請戎奮武之至意欽佩莫名都咨並稱令各省體察情形指陳利弊各抒所見陸續奏咨等因竊維今日用兵專恃火器外洋各國鎗礮之製日出而精進武學教練之法日推而益密然則武科取士斷宜專習火器別定新規然後無所習非所用之弊惟是變法伊始防弊宜慎取

才宜精臣查初次部咨會奏各條恐器械之不能盡一也則定指名代購之例恐藏用之漫無限制也則定報名存案之例二次部咨照廣西撫臣黃槐森原奏洋鎗由士子購買鎗桿鎗致生姓名防微杜漸頗極周詳顧臣仍有懇懇慮者軍火一項例禁最嚴固立法之精密有國之恆規攷之東西各國保安之鎗游獵之銃皆須繳納稅捐頒發執照違者或科罰或沒入或監禁則視其多少而爲之差蓋與我國舊例用意大略相同自髮捻蕩平以來各省遂無大亂其實廠添邊隅亂萌時有卽如近來熱河教匪甘肅回匪亦甚披猖或兵甫集而眾降或鋒一交而敵潰實由同治初年洋鎗洋礮流入中華漸推漸廣官軍所用無論精粗總係洋械火器精利聲威震驚亂民無抗拒之資宵小弭孽芽之漸今若概准演習一縣火器累百盈千收藏之家良莠不齊武生武舉本多強梁生事之徒又假以利器一有意外會匪游勇糾結橫行頃刻亂作其禍不可勝言雖云稽察責諸地方然州縣事繁習惰不過視爲查私鑄查燒鍋禁宰牛禁賭博之類但以其文行之若時常挨戶搜查則不免騷擾若但憑差役一報鄉保一結則必然有名無實卽如民間私藏鳥鎗州縣官例有處分而閩粵鄉鎮鎗礮如林然則稽查之說豈可恃乎光緒十七年江南有查獲洋人美生私買軍火接濟會匪謀奪鎮江以攻金陵之案二十二年廣東有查獲匪徒孫文私運軍火入城爲亂嗣據廣州省城之案前鑒不遠豈可更揚其波乎且近日各國鎗礮式樣日新名目

繁雜同一鎗礮而藥彈門類區分甚多改造原裝等差不一若應攷者每人各執一式之鎗如何攷校高下如須同係一式私家零購則先後參差由官代購則不勝紛擾此層似多窒礙臣詳稽籌制參攷新章審酌通籌謹擬一營伍學堂武科三事合一之法查原奏章程第四條云欲廣爲招徠則綠營制兵防營練勇不妨准其報名鄉試又二次部咨云此次改章在合攷試與操防通融定制凡武生投營營兵應試以及武舉武進士如何教練管束各大吏當參酌營制妥籌良法各等語竊謂莫如就此條之意而推之查武場條例內八旗驍騎校前鋒領催等官以及馬甲步兵分別准應武鄉試武童試綠營兵丁有願應武童試者各歸本縣與武童一體攷試其取進武生准應鄉試中式武舉准應會試其千把等官或係武生或係武舉分別均准鄉試會試故各省向有兵生兵童名目是武科人才取諸旗綠各營弁兵本係國家舊制既以用其素習兼以勵其勸操立法之意極其精切宏遠至今於旗綠弁兵而外又有防營弁勇一項比之綠營年力人材較爲強壯操練火器較爲熟嫻今武科改試鎗礮莫若卽令營弁兵勇應試最爲無患於地方而有益於軍旅若令應武試者皆入武備學堂肄業一節勢有所難目前風氣初開有武備學堂者只有四五省一省亦只一堂且武童教習甚難不能不取材於異地故學堂之經費既鉅學生之類數無多大率一堂不過數十人又必須文理清通氣習馴謹者若各府各縣均設學堂一時斷無

許多之經費亦斷無許多之教習若派人分往教練則中華將弁向來惟恃勇敢其精細者不過約束紀律較爲詳明其於火器理法測算繪圖工程製造海形勢卒能通曉至文理通暢能讀洋書者尤不易觀故各省大小武職能教兵勇者或間有之能教將弁者絕無其人其稍能通曉一二能教兵勇者卽已矜貴非常則必留在防營使充營官教習豈肯令其散往各屬教習武生武童乎是學堂之廣設尤爲不易至各營兵勇究係曾經本營華洋教習教練雖不能盡諳精深尙可得其粗淺且外洋定章凡入武備學堂三年者必須隨營操練一二年以增閱歷斷無學生而在營伍之外者若卽令兵勇應試名籍以考鈴束易施所用鎗礮發之本營自然一律擬請惟兵勇准應武童試兵勇取進武生後仍在營充伍者准應武鄉試兵勇中武舉後仍在營充伍者准應武會試其已拔實缺外委實缺把總候補千總者准作爲武生應武鄉試已補實缺千總守備者准作爲武舉應武會試綠營弁兵令該管專營之將官都司保結冊送童試由各營送交原籍知府錄送學政考試免其縣考以省紛繁而免曠誤旗營仍照舊章鄉試仍由綠營勇營各管官冊送學政錄科會試仍照舊章但武弁兵勇均應照例歸原籍考試不得混考凡非在營現充武弁兵勇者均不得應武童試此後既無營外之武童自無營外之武生既無營外之武生自無營外之武舉武進士矣其從前取進取中之武生武舉現未入營者准其呈請附入本省防營或學堂

自備資斧隨同學習其鎗礮即用本營本堂者藥彈價值由該生呈繳並仿照外洋學堂章程令其酌繳該生火食束修雜用器具各費由該營營官及管堂之以察其年力精壯性情謹樸者方准投錄若不守條規不能勤學頑鈍難教者均隨卽斥退其學堂畢業者分發本省各營酌量委用將來風氣漸開藉并能充教習者漸多各府州縣有自行籌資設立武備學堂者准其稟官辦理既設學堂則必由官約束稽察章程雖有鎗礮可無伏戎藉寇之虞迨學成後統發各營分別効用則營伍學生合爲一貫是整飭科舉卽所以整飭營伍矣總之非現在營伍之兵勇不准應武童試非現在營伍之武生武舉不准應武鄉試武會試卽例准應試之武弁若現不在營者亦不得錄送咨送鄉會試正與部臣前奏寓營制於科場之意相合其利有三外洋火器價值甚昂平日練習需用藥彈爲數尤鉅若生童情費不賄則操練無具臨場考錄勉湊中額仍無裨益若各省紛紛購買則合計所費不貲似乎空增一絕大漏卮亦爲非計今應試取之兵勇則操練械藥本是各營應有之需固有願附入防營學習者規矩嚴肅人數必不甚多且所有鎗礮卽由官借用藥彈由該生繳價是曰塞漏其利一也我朝將材輩出大率不外乎旗營官校綠營弁兵召募練勇三項總之皆係行伍自咸豐軍興以來其由武舉武進士呈效著稱者實屬寥寥此輩恃符武斷如虎而冠魚肉鄉民窩庇匪類如過歲試鄉試武童武生聚集省城府城必滋生無數事端

街市店鋪日有戒心訛詐逞兇防範隱忍待至場畢則彼此相慶各省官商士民無不以爲巨惠萬口一詞徒以舊例相沿幾如附骨之疽去之無術究其所長者不過粗豪臂力倖中箭枝不識字者十人而九臨敵之火器既未嘗習制勝之輜鈴更未嘗解即使安分守法豈能與於干城腹心之選乎且各省武生武童習騎射硬弓刀石亦只臨場肄習數月無論中否考過輒已廢棄於國家儲材禦侮之意毫不相涉今若專令營弁兵勇就試卽進武學登武科以後仍有本營長官鈴束無從爲非其技藝亦不至荒廢如慮專准兵勇應試恐武童武生必少則又不然一省綠營弁勇合計多者二萬以外少則一萬五千以外三年之內止取武生千餘名取武舉數十名或十人而取一或二十人而取一何慮不敷且應試者果能人人皆有材藝何在於多如本無材藝混場僥倖聚衆橫行多愈爲害從此可爲地方暗減此一項違法擾害之游民此又潛移默化之微權矣是曰戢暴其利二也噉香征討髮捻之時各路軍營有以步卒水手不數年而保至提鎮者海內忠勇之士翕然向風近年軍務收平保案少則防軍之拔擢難文法繁則綠營之升遷尤難雖有偉材壯志無所得官糧餉聊以糊口操練視爲具文雖經按期閱多方獎勵收效終微兵勇自視不過如擔夫匠役食力營生其誦愿者僅不爲會匪地痞而已人既卑視兵勇兵勇因而自卑若望其深明敵愾同仇之大義講求破敵制勝之方略蓋亦難矣今若懸此一途以爲營弁

兵勇進身之階功名所在則肄習自精不待朝廷督責將帥勸勉而各省各營皆爲勁旅矣是曰勵軍其利三也抑臣尤有請者親上死長者強國之本原明恥教戰者強兵之要術當此強敵憑陵正所謂天下危迫之會近年東西洋各國精研兵事最重武職其國君卽服提督之服鄰國之君互相贈送以將官之銜故人人以當兵爲榮以從軍爲樂以敗奔爲恥王子之母下儕戍卒一隊之長榮若登仙凡挂名軍籍者居鄉則里黨貴之過市則路人敬之以故弁兵之自愛聲名修飭行檢過於儒士中國有曰好鐵不打釘好人不當兵之諺稍有身家戚所鄙棄賤之分強弱之源也夫中國所貴者士士之徒步而至公卿者多矣人之貴之蓋有由也中國所賤者兵兵之荷戈而流爲傭丐者衆矣人之賤之固其所也卽使不盡爲傭丐而三四十歲以外猶爲廩養之賤卒五十歲以外始爲循資之裨將既已純乎暮氣豈能建立奇功今欲重武厲兵而積習已深不能驟改盡心勸勉亦恐無裨惟有厲行伍以科舉之一法使其非由行伍不得科舉非由科舉不得將官爵祿所在則傑士爭趨流品既殊則廉恥自立將領不肯侮辱旁人不致輕賤從此凡爲兵勇者儼然又列士流欣然請得大獎夫然後世族文儒皆肯入伍感憤奮發人有執干戈衛社稷之心然則今日欲求中國士氣之奮軍實之修轉移微權必在於此又臣區區之微意也綜考各國軍學有武政而無武科其各等學堂以次考拔發營錄用卽是中武科武試從無不由

學堂出身之官校亦無不充軍營官校之學生其法實將武營武學武科三事合而爲一其法最善故今日欲採擇西法莫如先自練兵始欲學西人之練兵莫如先自開兵勇之升階合學堂營伍始矣若其學習攷試之法非僅改用鎗礮遂能收效歷攷外洋諸國從無不讀書不明算不能繪圖之將弁亦無不識字之兵丁誠以今日戰事日精戰具日巧卽一哨弁之微亦斷非粗材下品所能勝任若只攷鎗礮準頭從容施放中靶者多殊難去取且照此卽授以待衛參游都守之官似亦太易擬請仿馬步箭弓刀石武經三場之制頭場試鎗礮準頭兼令演試裝拆運動之法二場試各式體操及馬上放鎗步下擊刺之技三場試測繪工程築壘鐵路地雷水雷與他戰法等學鄉會試格式宜較嚴重試格式宜較寬三場合較智勇兼優將來溶膺將領庶可勝任又攷外洋兵制及武學章程初入營及未弁入學堂者多不得過二十歲蓋以年力少壯則體操及測算各事始能按程學習穎悟易通以後凡應試武童武科亦宜酌定年限卽武科從寬亦不得過二十五歲至所試之鎗則以單響毛瑟爲主蓋此項鎗彈各局多能自製礮則以單響七生半車礮六生半礮爲主蓋此項礮用處最多而漢陽局製熟鐵六生車礮一名兩磅礮成本略輕雖不如外洋之精操練亦頗可用他局仿造尙不甚難卽自江南購造亦不甚難若本省自有七生半車礮者亦可通融學習攷試通行似惟此兩種鎗礮最爲適用而易得若快鎗礮過於精巧珍貴各路

軍營尙且難得各省生童豈能皆習此種他日製造既廣改習亦非難也方今時際艱危宜防隱患事關變法不厭詳求臣等見所及不敢緘默是否有當恭候 聖裁其有未盡事宜自當遵照卽行陸續開單

奏咨得 旨著兵部會同總理衙門議奏○己巳 上幸恭忠親王邸第賜奠○上還宮○諭自古致治

之道必以開物成務爲先近來各國通商工藝繁興風氣日開中國地大物博聰明才力不難傑出祇以困於鈎習未能自出新奇振興庶務富強至計首在鼓舞人才各省士民若有新書以及新法製成新器果係足資民用者允宜獎賞以爲之勸或量其材能授以實職或錫之章服表以殊榮所製之器頒給執照酌定年限准其專利售賣有能獨力創建學堂開闢地利興造鎔鐵各廠有裨於興國殖民之計者並著照軍功之例給予特賞以昭鼓勵其應如何定章之處著總理各國事務衙門卽行妥議具奏○諭胡聘之奏邊疆武科改制各節開單呈覽一摺另片奏鄉會各試請將學堂生童擇優取中等語著兵部會同總理各國事務衙門併入陶模奏請變通武科摺內一併議奏○庚午駐俄欽差大臣楊儒與東省鐵路公司訂立合同七款○辛未兩○大理寺少卿盛宣懷奏籌辦中國通商銀行次第開設請 飭下戶部通行各省關嗣後凡存解官款但係有中國通商銀行之處務須統交銀行收存匯解以符事體而樹風聲得 旨戶部速議具奏○總理各國事務衙門奏茲有剛果國使臣余式爾於本年四月三十日來

京奉有本國國君文憑商辦約章臣等於五月初四十六等日照章接待並據該使臣面遞國書一件條約節略一紙臣等查剛果國雖爲比利時兼轄之邦然係自立一國在阿非利加洲之南中國自與各國通商以來風氣大開到處皆有華民前往今該國既遣使來華訂約正可藉此多開一華民謀生之路似應准其訂約惟不必照歐美各國條約之繁冗因與訂簡明專款二條以示羈縻而昭友睦茲將所訂專條照錄恭呈 御覽如蒙 俞允卽請 簡派專員與之畫押換約該使臣面遞譯漢國書一件並鈔呈覽得 旨如所議行○壬申 上御文華殿美國使臣田貝康格覲見○文悌奏奴才生長滿洲舊族誦習孔孟遺習世受 國恩幼承家教惟知奉公守法時欲報 主捐軀憶乙酉之年在戶部郎中任時京察一等蒙 皇上召見於養心殿親聞 聖訓命奴才謹慎當心破除情面奴才退卽以此八字鐫刻圖章終身膺佩是以奴才蒙 恩外簡河南知府三年不受一人私書京中故舊亦皆未嘗以一字通問服官京外三十餘年從不敢沾染陋習與人接盟換帖除幼年受業同學大人外亦絕無拜上官舉主爲師頗以此取怨招尤不以爲悔蓋深懷 皇上破除情面訓辭亦由奴才四世祖鄂伯諾費揚武在康熙年間見族人熬拜亂政伏罪因著有清文家訓令後世子孫皆重寡父永戒植黨赤心報國勒石祠堂奴才等世世守之弗敢違也今者備員臺諫目覩同官中有爲人指使黨庇報復紊亂臺諫者奴才於此

事確有聞見謹遵 皇上破除情面訓誡續晰陳之奴才於光緒二十四年五月初九日恭讀邸鈔見御史宋伯魯楊深秀聯名參劾部尙書許應騷守舊迂謬阻撓新政及許應騷奏 旨明白回奏原摺各一件許應騷在朝歷舉初碌碌未有奇節奴才與之向無往來晤對亦未聞其有講求實學之名此次見其覆奏摺內所稱珍惜名器物色通才等言深合大臣之體始知該尙書立身行事自有本末轉過於奴才平日所聞至該尙書摺內所指工部主事康有爲請將其罷斥驅逐證以奴才見聞所及許應騷所言亦適相符合伏維奴才服官京外已數十年康有爲向不相識去年十二月奴才改官御史忽於今年春間由原任大學士閻敬銘之子道員閻迺竹致奴才一信言有傑士康某欲訪奴才相見奴才昔在戶部爲閻敬銘賞識天下所共知然於閻迺竹向亦不相聞見只於去年十二月引見御史之日在朝房始一識面奴才當卽兩覆閻迺竹云方今士大夫存誠踐實之時非標榜聲氣之日康某何須必相見也以阻之而康有爲仍復踵門求謁奴才因與晤言接談之頃聞其議論頗多偏宕然見其激昂慷慨以爲是蓋志士愛時抑激而出此雖卽以言規正之而心亦喜其負氣敢任或可救今時萎靡佞積習不爲無用於其去後曾致閻迺竹信告以康有爲不無血性可愛惟其看天下事太易正恐不足有爲迨後康有爲數數來奴才處送奴才以所著書籍數種閱其著作以變法爲宗而尤堪駭詫者託辭孔子改制謂

孔子作春秋西狩獲麟爲受命之符以春秋變周爲孔子當一代王者明似推崇孔教實則自申其改制之義大抵援據公羊何休學黜周王魯變周從殷之說首引董仲舒春秋繁露淮南子各書以爲佐證不知何休爲公羊罪人宋儒早經論定董仲舒本傳其所著繁露玉杯竹林各篇今本則皆在繁露一篇之中故崇文書目已疑春秋繁露非董子原書程大昌攻之尤力 國朝文淵閣纂錄春秋繁露十七卷亦置之附錄提要謂其中無關經義者多再攷漢書董仲舒本傳當時其弟子呂步舒已不知其師說以爲大愚何況數千年後士不獲親見聖人自三傳以後假託聖賢以伸己說者何可勝數又焉能於蠡簡之餘欲盡廢其精義一家之旨而謂爲獨得聖人改制之心哉至於淮南乃漢淮南王劉安所著書殷變夏周變殷春秋變周三代之禮不同等言不過叛王篡亂之辭殆與漢末張角妖言蒼天已死黃天當立正同尤不可據爲典要山是奴才乃知康有爲之學術正如漢書嚴助傳所謂以春秋爲蘇秦縱橫者耳然奴才猶以爲方今時事孔棘求才未可一格譬如烏附蛇蝎皆有毒藥品然以此治風痺疾轉良於參朮善若只在用之何如也及聆其談治術則專主西學欲將中國數千年相承大經大法一掃刮絕事事時時以師法日本爲良策奴才於咸豐庚申年始年十二三歲卽留意西學故三十餘年所見泰西書籍頗多亦粗通二十六母拼字之法及其七十課學習之訣頗有志習學其大算格致之法前者在戶部

會計光緒七年出入計帳全用西法歲計算法非絕口不談洋務者比卽近日數上奏議彈章亦曾以推廣新學爲言已在 聖明洞鑒之中惟中國此日講求西法所冀使中國之人明西法爲中國用以強中國非欲將中國一切典章文物廢棄摧燒全變西法使中國之人獸化潛移盡爲西洋之人然後爲強也故其事必須修明孔孟程朱四書五經小學性理諸書植爲根柢使人熟知孝弟忠信禮義廉恥綱常倫紀名教氣節以明體然後再習學外國文字言語藝術以致用則中國有一通西學之人得一人之益矣若全不講爲學爲政本末如近來時務知新等報所論尊俸力伸民權興黨會改制度甚則欲去跪拜之禮儀廢滿漢之文字平君臣之尊卑改男女之外內直似只須中國一變而爲外洋政教風俗卽可立致富強而不知其勢小則釀起鬪爭召亂無已大則各便私利賣國何難奴才曾以此言戒勸康有爲而康有爲不思省改且更私聚數百人在 筆轂之下立爲保國一會日執途人而號之曰中國必亡必亡其會規設議員立總辦收捐欸竟與會匪無異以致士夫惶駭庶民搖惑私居偶然亦均曰國亡國亡可奈何設使四民解體大盜生心藉此以集衆匪徒招誘黨羽因而犯上作亂未知康有爲又何以習其後是則康有爲立會倡始名爲保國勢必亂國而後已焉奴才於其立保國會後曾又與面言恐其滋生亂階令其忠君愛國合爲一事幸勿徒欲保中國四萬萬人而置我 大清國於度外而康有爲亦似悔之

奴才由是不欲與之往來然仍謂其心或無他只不過不知輕重尚未深惡其人迨後許應騷等阻其在會館聚眾又有人奏參康有爲忽到處辭行奴才慮亦兩次來辭云將回里養母奴才當卽作詩送之諷以歸隱並有勸其切勿走胡走越之言不意其僞爲歸養以愚譏彈而暗營保薦以邀登進乃於辭行之日忽有召見之事奴才至是始覺其詐僞多端斷乎非忠誠之士心鄙其人矣而康有爲見奴才於其賜對後絕無聞問又於四月初七日使其弟康廣仁至奴才處求見奴才不與相見爲奴才留一信云康有爲在寓患病現奉旨令其進書是時宋伯魯楊深秀等已參劾許應騷許應騷已明白回奏惟原摺邸鈔未見奴才欲知宋伯魯等所奏云何又聞康有爲奉旨進書欲知其進書之意何在且仍欲勸其安靜勿再生事端遂於初八日至康有爲寓所其家人因奴才問病引奴才至其臥室案有洋字信多件不暇收拾康有爲形色張皇忽坐忽立欲延奴才出坐別室奴才隨僕又聞其弟怨其家人不應將奴才引至其內室奴才乃忽忽立起惟告以中牖有云萬物並育而不相害道並行而不相悖萬不可分門別戶致成黨禍置國事於不問而康有爲兄弟同言卽今在朝諸人又何嘗以國事爲問乎奴才仍勉以說蒙恩命爲總署章京則當謹慎趨公以圖報効康有爲言實不能爲此奔走之差現奉旨進書書進仍然回籍其弟又謂奴才云朝廷特罷制藝何不從速乃待下科且生童小試尤當速改策論奴才

見其終不可諫乃舍之而去初九日遂於邸鈔中見許應騷覆奏中言康有爲少卽無行通籍回里屢次
構訟督京後終日聯絡臺諫緣要津再三干謁又在會館私行立會聚眾至二百餘人入對奉旨充
總理衙門章京不無觖望捏造浮詞諷言官彈劾等情奴才更深信康有爲不過一輕浮巧猾之徒獨怪
以閹倣銘捐介家風而閹迺竹何爲交結此人且引薦至奴才處也由是憶其曾於閏三月間擬有底稿
二件囑奴才具奏一件欲參廣東督撫一件請釐正文體吏變制科當時卽經奴才曉以科道爲朝廷
耳目之官遇事原不能不向人訪問然必進言者自有欲言之事參詢細訪於人若受人指使而條奏彈
劾是乃大干列祖列宗嚴禁斷不敢爲且其欲參廣東巡撫奏中特爲清查沙田一事而發奴才拒
之尤力至今其擬來奏底仍存奴才處而其釐正文體一事已有楊深秀言之矣至康廣仁所言罷制藝
不必待下科小試尤宜速改策論而宋伯魯又適有此奏是許應騷謂其聯絡臺諫誠不爲誣又康有爲
於閏三月間忽遣其門生廣東廉州舉人林纘統持其信函至奴才處求見奴才聞林纘統係會試舉人
亦卽延見乃林纘統並非來京會試因其在廉州聚眾州衙哄堂塞署之案其子弟迄今仍監萬州獄康
有爲令其尋奴才爲之奏辦時奴才正在都察院署理京畿道事務告以如有冤抑應到院呈訴不當在
私宅商辦乃林纘統竟於次日備辦禮物至奴才處餽送甚至奴才幼子童奴皆有贈貽奴才大駭立卽

驅逐之去告以如敢再來定即奏交刑部林纘統去而康有爲旋來奴才以正言責之而康有爲且言禮亦微物係由康有爲代備初不以爲愧怍至今康有爲引薦林纘統申訴之信亦仍存奴才家由是則許應駁言其擯訟亦不爲無據至康有爲兩三月中凡至奴才處十餘次路隔重城或且上燈後亦至往往見其中攜有袋枕奴才家丁聞其隨僕皆言其行蹤詭秘恆於深夜至錫拉胡同張大人處住宿蓋戶部侍郎張麟桓與康有爲同鄉交深情密是則許應駁言其實緣要津亦屬有因若云用爲總署章京不無缺望奴才實親聞康有爲有不能當奔走差使之言由此觀之則許應駁所論康有爲各節皆非揣測之詞概可信也總之康有爲之爲人講學如明之李贄干進如明之陳啟新尤屬膽大妄爲不安本分性非安靜然而奴才始尙以其深通洋務事不妨節取所長留爲偵探採訪之用故兩次至其寓所回拜十餘次在奴才家與之晤言雖無一次不規勸其失於其囑託均不敢聽受後亦明知其生事然不欲參劾蓋恐或阻抑朝廷破格求才之路今見許應駁所奏應指其奸若終始不諱則有違皇上破除情面之訓且恩賞甚且康有爲又曾在奴才處手書御史名單一紙欲奴才倡首鼓動衆人伏闕痛哭力請變法其單內所開多姦諛中知名之人而宋伯魯楊深秀卽在其中後康有爲立會保國在單之人皆不與聞惟宋伯魯楊深秀兩次到會列名傳布奴才於其開單之時卽告以言官結黨爲國朝大

禁此事萬不可爲而楊深秀旋卽便服至奴才處仍申康有爲之議且奴才與楊深秀初次一晤楊深秀竟告以萬不敢出口之言於奴才是則楊深秀爲康有爲浮詞所動概可知也至宋伯魯奴才未曾與之晤言而聞其曾上設立公司之奏亦係康有爲持此議先導黃桂黎陳奏御史黃桂鋆不爲所使竟爲宋伯魯奏之以康有爲一人在京城任意妄爲徧結胥官把持國事已足駭人聽聞而宋伯魯楊深秀身爲臺諫公然聯名庇黨誣參朝廷大臣夫容臺本執禮之官宗伯以守舊爲過一則曰重邦交再則曰傷邦交以今日之非禮苛制諸臣曲全大局正患無禦侮之才倘使許應騷能折衝樽俎遇事挽回得一分卽可爲朝廷存一分國體凡爲大清臣子孰不喜之奈何獨以爲罪乎尤可怪者原摺竟敢捏擬以三四品京堂降調干預皇上黜陟大權實從來所未有此風又何可長也宋伯魯前者黨庇薛允升今者又與楊深秀黨庇康有爲專以報復爲得計原摺謂可免鄰封之笑柄以奴才觀之該御史等縱不慮天下後世笑不知同臺中正有笑之者矣孟子曰國君進賢如不得已國人皆曰不可是康有爲也我聖祖仁皇帝御製臺省箴曰或臧嫌怨謬爲雌黃受人指囑尤爲不臧是宋伯魯楊深秀也奴才身沐聖朝厚恩久存不敢避嫌違怨之志故於三月初一日初次封事卽以請甄別御史爲言今目覩此情初亦再四躊躇恐蹈明季科道攻訐惡習避之十日不敢輕於陳奏繼思國家變法原爲整頓國事非

欲敗壞國事譬如人家屋宇年久失修欹斜欲覆勢宜改造自應招集工匠依法拆卸庶乎瓦木不損終成室廬若任三五喜事之徒運以重椎想以巨索邪許一聲曳之傾仆而曰非此不能捷速姑無論甄石梁棟毀折摧傷且恐因而壓人更何改造之有其間稍有阻止持重者則反加之礮雷此何理也今康有爲之變法宋伯魯楊深秀之參劾何以異是此奴才所以終不敢已於言也所有康有爲之爲人如是是否可用應如何辦理 皇上自有權衡至宋伯魯楊深秀顯有庇黨變聽情事然奴才終恐啟臺諫互相攻擊之風仍未敢擅擬其去留可否請 旨飭下都察院堂官查覈該員等是否堪勝御史之任覆奏請旨辦理奴才爲整肅臺規起見謹繕摺陳伏乞 皇上聖鑒再康有爲歷次致奴才信兩所擬摺底如有應行攷覈之處奴才當呈交都察院堂官咨送軍機處備查合并聲明 上諭御史文悌奏言官黨庇誣罔變聽請旨飭查一摺據稱御史宋伯魯楊深秀前參許應礮黨庇變聽恐啟臺諫攻擊之漸等語該御史所奏難保非受人唆使向來臺諫結黨攻訐各立門戶最爲惡習該御史既稱爲整飭規範起見何以躬自蹈此文悌不勝御史之任著回原衙門行走○許景澄奏本年三月初六日俄署使巴布羅福在京訂租旅順口大連灣連通北所需保守陸地所有租地陸地界綫於所訂條約內聲明在案彼得堡另立專條經總理各國事務衙門電知臣等與俄外部大臣模拉維諾夫逐細籌商並以金州關在大連

海北有文武官駐紮另照會巴使不能歸入租界又第八條酌量在營口鴨綠江中間沿海地方築一枝路指地太廣慮其另擇別處通海又添一口等因一併令臣等商辦經臣等詳繕節略指陳利害再四執論始據外部交送擬稿酌允退讓臣等詳加查察復就各款分別准駁增改原稿再與駁辯外部續有允改臣等尙在磋磨適俄兵部接其在華水師提督電報以金州兵開鎗轟擊俄營即欲派隊徑赴該州隱圖佔守外部亦漸變初議三月三十日面交定稿稱此稿已呈俄君閱定不能再有商改旋經總理衙門商令巴署使發電勸阻臣等又執論如前外部始允飭止俄兵勿入金州城其未盡事宜議明彼此各送照會為據所有節次商論情形均經隨時電陳總理衙門在案閏月初九日准總理衙門電令聲明金州兵民口舌細故不可因此開釁欽奉諭旨俟俄允許後即著許景澄楊儒會同畫押欽此十六日准外部將臣等聲明各節照覆允認即於十七日臣等與俄外部大臣各將專條漢洋文畫押訖綜計專條凡六款首敘中國俄國願在北京所定條約增立數款第一款租地北界從西岸亞當灣北起過亞當山脊至東岸皮子窩灣北邊處止附近水面及各島均准俄國享用兩國各派專員勘定界綫此款亞當皮子窩兩海灣為旅順大連灣後路屏蔽倘非腹地要隘查與原約酌視旱地合宜保守事理相符第二款陸地界綫從西岸蘆州河口起經岫巖城北至大洋沿河左岸至河口此款外部原議從西岸營口起經海

城鳳凰城大姑山至東岸五道河口止查營口爲通商要埠鳳凰城又係邊要列入曠地與日調兵事宜不免牽制窒礙現定界綫刪去三城於防務頗有裨益第三款俄國允通接遼東半島鐵路亦處在旅順大連灣海口不在沿海別處公同商定此路經過地方不將鐵路利益給與別國人以後中國自造從山海關接長之路俄國永不干預此款俄路不至沿海別處可杜日後借擇便築路爲名添開海口之患又中國自造路一層係上等改稿時與外部商允加敘藉與不給他國利益之說互爲抵制第四款俄國允金州城歸中國自行治理並設巡捕人等中國兵退出金州以俄兵替代居民有權往來金州至租地北界各道路並用附近之水並據外部照會稱奉俄君之命試辦俄兵屯紮城外非有民亂及攻擊俄兵之事不得入城臣等又照會外部該城旗兵卽作居民論不能移撤亦據外部復允此款因提督藉端煽動臣等與外部反覆爭辯皆占幾微誠慮懸議相持以後措置該城愈無歸束不能不就現在商允情形定訂以杜翻異第五款中國允不將曠地讓與別國享用曠地內東西海岸不與別國通商亦不讓給道路開礦及工商利益等項查原約載明曠地內治理全歸中國官自無有讓給他國土地利益之事至曠地界綫並將營口畫出所敘不與別國通商尙無窒礙第六款以上各款繕立舊文俄文各一分由兩國全權大臣畫押鈐印過有講諭以俄文爲證以上全文並畫押日期均已電達總理各國事務衙門查核

等竊維 朝廷爲修睦結鄰起見允准俄國租用地段現在租地隙地界限已定自可無虞侵軼惟金州一城孤懸租界之中地勢輻輳辦理實無萬全之策相應請 旨飭下該城副都統體察目前情形嚴諭駐防兵丁與民衆一體安居庶彼族釋猜忌之心卽地方收羈縻之效得 旨該衙門知道○癸酉世鐸等奏光緒二十四年正月二十六日內閣奉 上諭胡燏棻奏請就各省現有兵餉精練陸軍一摺著軍機大臣會同督辦軍務王大臣妥議具奏另片所奏神機營改用新式鎗礮各節著一併議奏欽此又三月二十四日內閣奉 上諭伍廷芳奏京營暨各省綠營請參用新法訓練等語著軍機大臣會同神機營王大臣八旗都統妥議具奏欽此 等正在核議間五月初九日內閣奉 上諭前據順天府府尹胡燏棻奏請精練陸軍並神機營改用新法操演又出使大臣伍廷芳奏京營綠營參用西法各摺片當經先後諭令軍機大臣會同督辦軍務王大臣暨神機營王大臣八旗都統妥議具奏現在督辦軍務處業已裁撤所有諭令議覆各節卽著軍機大臣會同神機營王大臣八旗都統迅速議奏毋得延緩欽此查胡燏棻原奏內稱現在海軍無力猝辦自以精練陸軍爲急應以沿海爲最要沿江次之腹地又次之但必弊去而效乃可見各省防營缺額之弊仍不能免大抵八成隊伍居多月餉不足養贍身家每營長夫徒爲將弁分肥之舉擬請裁去虛額統以八成爲定額卽以所裁之餉加給統領營哨各官薪水酌增勇

餉核定夫額操演必仿西制於所留八成內汰去老弱另行招募各省武備學堂卒業學生卽酌派本省教習未設省分或於諸士成衰世凱兩軍內咨取教習先行挑選三成練熟後卽於其中挑選哨官哨長分撥六成之內一律改用新法但中國視兵過賤應募之始類皆窮困無聊操法過勤勸報告假成軍一年半非舊人練如不練是在責成將弁平日視兵如手足一有犯令執法嚴明恩威並濟訓練交施二年之內或可得一勁旅然宿將狃於成法或藐視武備出身之教習而武備教習又視舊制將弁爲無用往往積不相能全賴疆臣一力維持訪求知兵大員責以練兵之任勸將統領統歸節制又京城神機營仍沿舊制所用烏鎗臺礮難與洋鎗爭勝請悉用新式鎗礮迅速改練西法奉天吉林黑龍江三省防練各軍操法未能如式請將北洋武備學堂新練旗兵分撥赴該三省充當教習並撥充神機營教習宋慶營制隊伍過於渙散請統改五百人一營亦照新法訓練伍廷芳原奏內稱京營習氣已深各省綠營有名無實宜掃除積弊更定新章專以水師武備學堂充選認真者校以次漸升非精習陸操不使爲陸路統領非曾當海軍不准爲海軍將弁各等語等查練兵爲當今急務而改練洋操尤爲練兵要著該府尹等所請減裁虛額酌增勇餉挑選教習訪求將領及專就水師武備學堂內選取兵弁各節均爲切中時勢之論惟練兵必先籌的餉前據戶部兵部核議御史曾宗彥奏請精練陸軍悉改洋操摺內聲稱各省

綠營勇營兩項歲需餉銀約三千萬兩按江南自強軍向章銀數核計僅能練洋操二十餘萬人以天下之大而以二十餘萬人分布恐不足以資鎮壓請令各省將實存勇隊釐定去留實支餉精實爲歸併然後一律挑練務於文到六箇月內核奏等因欽奉 諭旨寄信各將軍督撫遵辦在案應請 飭下該將軍督撫迅速籌議並將該府尹等所奏各節一併詳議辦法切實具奏不得徒託空言至該府尹等所請將神機營改用新式鎗礮操練及京營參用西法等因查神機營於本年二月間奉 旨挑選精壯馬步官兵萬人作爲先鋒隊勦加訓練專備征調之用所需鎗械先儘神機營庫存各種後膛鎗礮內挑選補換並由南洋大臣調去快利鎗枝應用隨時督飭認真演練如臥溝越壕築營分隊站鎗跪鎗各項隱伏擊刺技藝以及開挖地營濠溝修築土礮臺土鎗眼栽埋地雷等情已經次第演練又使走隊習勞漸增里數礮上纏裹鐵沙口袋視其力量逐漸加增演練既久如去沙袋自能行速並將新技及短兵相接之法多方教演以備衝入敵隊使敵人雖有致遠鎗礮亦無所用如此常川演練自應加給餉乾然本營常年領款儘敷例用當此庫款支絀之際不得不力求撙節先由本營裁汰馬隊酌減公費以資挹注藉就此節出之款將挑出馬步官兵萬人分爲兩班一半移紮 南苑一半分往兵廠每年二三四五八九十十一八箇月按兩箇月爲一班更番教練行軍戰陣諸法務使精益求精悉成勁旅俟將來籌有的款再

行奏明擴充辦理至八旗滿洲蒙古漢軍驍騎營共官兵七千一百四十一員名兩翼前鋒護軍營共官兵五千三百九十六員名現值整軍經武之際自應用新法演練挑八旗驍騎營暨兩翼前鋒護軍營所有官兵均以五成改習洋操五成改習洋機槍諸由都統內簡派八旗驍騎營統練大臣二員分翼管理其兩翼前鋒護軍營亦請由都統內簡派統練大臣二員分翼管理並著督同各旗營專操大臣變通新法認真操演務使一律嫻熟適用不得有名無實其應用教習及所需器械擬請由神機營咨調以備應用惟查八旗驍騎營官兵原有津貼本屬無多前鋒護軍營官兵向無津貼似宜酌添餉項庶於操務有裨至八旗漢軍驍騎營牌亦宜一律更易新法演練其未盡事宜均由統練大臣隨時奏明請旨辦理以昭核實上諭前據順天府尹胡燏棻奏請精練陸軍並神機營改用新法操演出使大臣伍廷芳奏京營綠營參用西法各摺片先後諭令軍機大臣會同神機營王大臣八旗都統妥議茲據該王大臣等會同議奏改練洋操為練兵要著各省綠營練勇迭經諭令認真其併一律挑練著該將軍督撫歸入前次戶部兵部議覆御史曾宗彥奏請改操摺內一併迅速籌議切實具奏神機營業經挑選馬步官兵一萬人勤加訓練即著汰弱留強實力講求務成勁旅八旗滿洲蒙古漢軍驍騎營兩翼前鋒護軍營均著以五成改習洋操五成改習洋機槍著派奕劻色楞額永隆管理八旗驍騎營崇禮載寧蘇

曉諭管理兩翼前鋒護軍營奕劻向來辦事認真諳武備務須會同簡派各員並督同各旗營專操大臣按照泰西兵制史定新章認真操演其八旗漢軍礮隊營簾牌營著一併改用新法挑練精壯如式演練以成有用之兵倘使日起有功何惜寬籌餉項各直省將軍督撫及該管王大臣等務當振刷精神屏除積習毋得始勤終怠至一切陣法器械營制餉章及挑選將弁教習各節著按照胡燏棻等所奏議定切實辦法奏明辦理用副朝廷整軍經武至意將此通諭知之○甲戌 上幸頤和園詣 慈福端佑康頤昭豫莊誠壽恭欽獻崇熙皇太后前詣安駐蹕○諭前經降旨開辦京師大學堂入學肄業者由中學小學以次而升必有成效可觀惟各省中學小學尚未一律開辦總計各直省省會及府廳州縣無不各有書院著各該督撫督飭地方官各將所屬書院處所經費數目限兩箇月詳復具奏即將各省府廳州縣現有之大小書院一律改爲兼習中學西學之學校至於學校階級自應以省會之大書院爲高等學郡城之書院爲中等學州縣之書院爲小學皆頒給京師大學堂章程令其仿照辦理其地方自行捐辦之義學社學等亦令一律中西兼習以廣造就至各書院需用經費如上海電報局招商局及廣東蘭姓捐頗有溢款此外陋規濫費當亦不少著該督撫儘數提作各學堂經費各省紳民如能捐建學堂或廣爲勸募准各督撫按照籌捐數目酌量奏請給獎其有獨力措捐鉅款者朕必予以破格之賞所有中學

小學應讀之書仍遵前諭由官設書局編譯中外西書頒發遵行至於民間祠廟其有不在祀典者卽著由地方官曉諭民間一律改爲學堂以節糜費而降教育似此實力振興庶幾風氣徧開人無不學學無不實用副朝廷愛養成材至意將此通諭知之○總理各國事務衙門與剛果國來使余式銓訂專款二條成其文曰 大清國與大剛果自主國和好通商之約擬照所奉合式之條現將專款彼此議訂連卽施行 一中國與各國所立約內凡載身家財產與審案之權其如何待過各國者今亦可施諸剛果自主之國 二議定中國民人可隨意遷往剛果自主之國境內僑寓居住凡一切動者靜者之財產皆可購買執業並能更易業主至行船經商工藝各事其待華民與待最優國之民人相同現各大臣先爲親筆畫押蓋用關防以昭信守○乙亥命裕祿在軍機大臣上行走○丙子以奎俊爲四川總督調德壽爲江蘇巡撫以松壽爲江西巡撫袁昶爲江甯布政使○調湯壽潛爲安徽布政使以于蔭霖爲雲南布政使○調趙爾巽爲陝西按察使以徐壽朋爲安徽按察使○盛宣懷奏請免南洋公學諸生歲科試俾得專心新學允之○諭各國傳教載在條約迭經諭令各該督撫妥爲保護以期民教相安乃本年四川北碚等處教案未了廣西永安州復有殺斃教民之事湖北沙市亦有因案牽連之事總由地方官不能仰體朝廷諄諄誥誡之意遇有民教交涉案件非漫不經心卽意存歧視畛域未化嫌隙易生無怪教案

之層見迭出也用是特加申諭各直省大吏凡有教堂州縣務當諄飭地方官實力保護平日如有教士謁見不得任意拒絕使彼此誠信相孚從教之人亦不致藉端生事一面開導百姓毋以薄物細故輕啟釁端即使事出倉猝該管官吏果能持平辦理亦何難消患未萌是在各該將軍督撫嚴飭所屬隨時妥慎籌辦從前未結之案卽著迅速了結此後不准再有教案倘仍防範不力除將該地方官照總理各國事務衙門奏定新章從嚴懲辦外該將軍督撫責無旁貸亦必執法從事勿謂言之不預也將此通諭知之○總理各國事務衙門奏臣衙門會同禮部議擬貴州學政嚴修請設專科一摺光緒二十四年正月初六日奉 上諭國家造就人才但期有裨實用本可不拘一格該衙門所議特科歲舉兩途洵足以開風氣而廣登進著照所請行其詳細章程仍著該衙門會同禮部妥議具奏欽此又浙江巡撫廖壽豐奏請飭妥議章程以收實效一摺三月三十日奉 硃批該衙門議奏欽此仰見 皇上側席求賢權衡至當欽佩莫名臣等詳繹廖壽豐原奏大抵以獎學精寔非培養不能成材而科場積弊已深必須實事求是酌量變通始足以激勵人材一洗從前陋習惟是特科 曠典原所以鼓勵羣倫自非剋日舉行無以轉移士習所請分別器使之法自可行之於既試之後不必律之於調攷之先至於歲舉各節按照特科大事徑由學堂選舉以修身明理繪圖知算爲根本以 聖諭廣訓孝經四書朱子小學爲入門酌改制

藝學院爲學堂裁減例章鄉會中額以互相作惠本來兼賅實能得古人論秀書升之遺意查宋世太學有積分之法歐洲學堂有卒業之憑亦並以平時考課差其甲乙多稽定論不恃一日之短長故得士多而無蹈虛之弊若仍拘拘試四書文附鄉會試則庸濫浮僞懷夾拾替之弊誠有如該撫所云法愈變而弊愈多者蓋特科爲風教所樹不妨寬以相求歲舉實培養之基不可泥於成法臣等恭聆 聖訓但期有裨實用不敢以前次議辦大略在先稍涉迴護謹議特科章程六條開列清單恭呈 御覽如蒙 俞允卽由 衙門咨行京外衙門一體遵行如有未盡事宜仍當隨時奏辦 上諭總理各國事務衙門會同禮部奏遵議經濟特科章程開單呈覽一摺所擬章程六條尙屬詳備卽照所請行經濟特科原期振興士氣亟應認真選舉以廣登進而勵人才著三品以上京官及各省督撫學政各舉所知限於三箇月內迅速咨送總理各國事務衙門會同禮部奏請考試一次俟咨送人數足數者選卽可隨時奏請定期舉行不必俟各省彙齊再行請旨用副朝廷側席求賢至意該衙門知道單并發將此通諭知之○總理各國事務衙門奏本月十七日奉 上諭自古致治之道必以開物成務爲先至應如何詳定章程之處著總理各國事務衙門卽行妥議具奏欽此臣等竊考泰西各國當二百年前一切新學新法皆未開闢自英有刑部尙書培根者始定一例凡有能製新器著新書之人國家給以優獎保其專利自此各國

之其獎之優者乃至賞給五等之爵專利百數十年此例既行舉歐洲美洲之人皆爭自濯磨講求新法故每年每國新出之器多至二千餘項新著多至三萬餘種智慧以相摩而開才能以相競而出論者謂泰西富強之原全在於是又前此一切醫政專賴國家興辦民間鮮倡議舉者自明宗時俄有富人名忒亞者捐二十萬盧布開辦學堂俄皇獎以大藏卿之職各國效之懸格以勸於是富而好禮之徒爭相捐輸有捐集數百萬磅爲學堂書樓之費者美國大學堂七所而民間捐辦者四此所謂重賞之下必有勇夫西國學術人才蒸蒸日上已然之成效也中土之人聰明才力不讓歐美而人才日乏國勢日蹙者殆由提倡激勵之未得其道也臣等恭繹 諭旨按照軍功授以實職示以殊榮仰見 聖明天錫洞見本原 明詔一宣將天下之士靡然從風不數年而新器新學倍出人才不可勝用矣臣等謹仰體 聖訓擬定詳細章程十二款或予世職或予實官或加虛銜或請許其專售或請頒之匾額無非所以奉宣德意鼓舞羣才所擬或疑過優然製新器著新書之人其切實致用視尋常科甲所試帖括端楷虛實難易相去萬倍何獨於此而薄之捐集款項興辦學堂之人爲國家分勞其所報効視捐納郎中道府爲數尤巨何獨於此而吝之臣等竊維鼓勵人才必高示其的始足以動觀聽必廣開其途始足以厲風氣或疑此例既開恐多冒濫然書器既由臣衙門詳核捐款復由地方官行查則與有司考試無異真才則獲

殊榮膺鼎則蒙厚罰魚目之混正自易防此皆無庸懸懸過慮謹將遵擬各款另繕清單恭呈 御覽如蒙 俞允擬請 明降諭旨飭下地方官將章程出示曉諭以風動天下 上諭前經降旨各省士民著將製器及捐辦學堂等事給予獎勵諭令總理各國事務衙門妥議具奏茲據該王大臣等議定詳細章程開單呈覽所擬給予世職實官虛銜及許令專利頒賞匾額各節量能示獎尙屬妥協著依議行卽由各衙門咨行各直省將軍督撫通行所屬將章程出示曉諭以動觀聽而開風氣朝廷鼓勵人材不靳破格之賞仍應嚴防冒濫所有著書製器各事該衙門務當認真攷驗展定罰懲以期無負振興庶務實事求是之至意 振興工藝給獎章程 第一款 如有自出新法製造船械鎗礮等器能備出各國舊時所用各械之上如美人乎祿成輪船美人余林士奇海底輪船炸藥氣礮德人克魯伯鍊鋼礮德人刷可甫魚雷英人亨利馬蹄泥快鎗之類或出新法興大工程爲國計民生所利賴如法人利涉礮蘇赫士河建紐約鐵綫橋英人奇路渾大西洋電綫美人湯曼燈德律風之類應如何破格優獎俟臨時酌量情形奏明請 頒特賞並許其集賢設立公司開辦專利五十年 第二款 如有能造新器切於人生日用之需其法爲西人舊時所無者請 給工部郎中實職許其專利三十年 第三款 或西人舊有各器而其製造之法尙未流傳中土如有人能仿造其式成就可用者請 給工部主事職銜許其專利十年

第四款 如有著新書貫通中外學政深明治體綱舉目張切實可用於今日者或能博徵時務發明

經義原原本本有功聖教者請 特恩賞給翰林院編檢實職或派往各省學堂為總教習 第五款

或著新書發明專門之學如公法律例農學商學兵法算學格致之類確有心得請 賞給庶吉士主事

中書實職發交總署及出使各國大臣各洋務省分因才器使或派往京師及各省大學堂專門分教習

凡每一人所著書必在二十萬言以上乃得請獎以杜冒濫既得獎後其書亦准自刻專售二十年 第

六款 如有獨捐巨款興辦學堂能養學生百人以上者請 特恩賞給世職或給卿銜能養學生五十

人以上及募集巨款能養學生百人以上者請 賞給世職或郎中銜募捐能養學生五十人以上者

請 賞給主事中書實職其學堂請 頒御書匾額以示鼓勵 第七款 如有獨捐巨款興辦藏書樓

博物院其款至二十萬兩以外者請 特恩賞給世職十萬兩以外者請 賞給世職或郎中實職五萬

兩以外者請 賞給主事實職並給匾額如學堂之例 第八款 其捐集款項添辦藏書樓博物院學

堂等事俸及萬金以上者亦請 加恩獎以小京官虛銜 第九款 如有獨捐及募集巨款開闢地利

若干設建鎗礮廠每日能製鎗礮若干視功用之大小款項之多寡為獎給之等差一如第七款之例

第十款 以上各款分別請獎之例皆就未得官之人而言若已經授職人員則遵奉 上諭照軍功例

請就原官超擢惟數中所有 特恩字樣則已仕未仕皆同一律 第十一款 凡請獎之例或由本人將所製之器所著之書所辦之事呈明總理衙門查核奏請辦理或由京外大員將所製之器所著之書所辦之事奏請交總理衙門查核辦理 第十二款 凡著書製器各事必由總理衙門認真驗實屬新書新器乃得給獎捐辦各事必行查地方官所辦屬實乃得給獎若有剽襲陳言冒認新書私販洋貨自稱新器及興辦各事捏報不實等情自應從嚴駁斥嗣後於眾以愧恥之若竟僥倖售欺得獎一經查出除撤銷獎案外仍當嚴示懲創已得官者革職治罪未得官者另行酌罰重款禁錮終身原保大臣分別議處○盛宣懷奏世變日棘庶政維新佐理萬端非人莫任中外臣僚與夫識時務之俊傑莫不以參用新制興學為先務之急臣於光緒二十二年冬間附奏請設達成館片內曾經陳明在上海地方設立南洋公學嗣以捐款難集而達成館之請已奉總理衙門王大臣等議覆應由戶部撥款辦理欽奉 諭旨飭遵又經臣奏明將原擬捐設達成館之款還充南洋公學經費在案 臣維師道立則善人多故西國學堂必探原於師範兼養正則聖功始故西國學程必植基於小學中外古今教學宗旨本無異同特中土文明之化開闢最先應世愈遠尚文勝質遺實探華而西人學以致用為本其學校之制轉與吾三代以前施教之法相暗合今日禮失而求諸野請西學延西師學堂之規模近似矣然臣前年創天津頭二

等學堂旁求教習招選學徒大抵通曉西文者多惜於經史大義之根柢致力於中學者率迷於章句帖
囑之迂拘教者既苦乏才學者亦難精擇竊咽然於事半功倍之故蓋不導其源則流不可得而清也不
正其基則構不可得而固也初擬籌設南洋公學擬照天津分設頭二等學堂繼念京師達成館未有興
辦之期滙館雖無所依仿不可不先行設法籌辦况師範小學尤爲學堂一事先務中之先務既病求艾
相需已殷急起直追惟恐弗及查有奏調三品銜分省補用知府何嗣焜學術湛深不求聞達臣與縱論
西學爲用必以中學爲體攷核程功次序極爲精邃志氣尤堅卓不致始勤終怠當經派委該員總理南
洋公學事務卽於上年二月間攷取成材之士四十名先設一師範院學堂延訂華洋教習課以中西各
學要於明體達用勤學善誨爲指歸復仿日本師範學校有附屬小學校之法別選年十歲內外至十七
八歲止聰穎幼童一百二十名設一外院學堂令師範生分班教之比及一年師範諸生且學且誨頗得
知行並進之益外院生亦多穎異之姿能專於學今年復將二等學堂先行開辦名曰南洋公學中院以
次續開頭等學堂名曰南洋公學上院上中兩院之教習皆在師範院則駕輕就熟軌轍不慮其紛歧外
院之幼童皆升於上中兩院則入室升堂途徑愈形其直捷師範諸生挑升教習至速以一年之後爲準
外院生分四班滿二年挑升中院中上兩院各分四班歲轉一班歷八年而卒業夫人才盛衰之機全視

在上之取舍伏查光緒二十三年二月安徽巡撫鄧華熙奏建二等學堂總理衙門議覆摺內有云所稱
頭等學堂教習誘掖生徒精益求精應如何優以仕途各節查同文館學生每屆三年大攷一次擇其學
業精進攷取前列者量予保獎或分部學習或分發省分或由出使大臣調充參贊編譯等官近且有徑
請簡派出使大臣者仕途不爲不優又各教習殷勤講授應照新疆設立俄文館章程分別有無官職
奏請獎敘各等語均經核准欽遵今 皇上復准總理衙門禮部議奏經濟特科歲舉之制俾天下新設
學堂書院所教有用之學皆得學成而各盡其用宇內學生莫不爭自濯磨竊維時政之艱大無窮君子
以致遠爲重環球各國學校如林大率形上形下道與時兼惟法蘭西之國政學堂專教出使政治理財
理藩四門而四門之中皆可兼習商務經世大端博通兼綜學堂係紳士所設海外部爲其教習國家於
是取才臣今設立南洋公學竊取國政之義以行達成之實於此次 欽定專科實數內政外交理財嗣
後每年大攷後當將學生名籍及攷定等級詳細造冊咨送各該省學政存候鄉試年分調取錄送惟各
教習不乏體用兼賅之選職在課徒施教至勞長途轉徙調取不及擬請將此次教習內應經濟歲舉者
由臣出具切實攷語咨請學政錄送其本係舉人准與經濟科舉人一體應經濟科會試此外擬仍請援
照新疆設立俄文館章程同文館學生大攷前列章程三年期滿由臣會同南洋大臣江蘇巡撫擇教誨

有才造就最廣者分別保獎以仰副 皇上甄陶才俊之至意至公學四院常年經費以輪電兩局歲捐銀十萬兩量入爲出僅可相當雖初辦兩年內上院未開約可節存銀五六萬兩惟開辦之費除學堂基地山莊捐購外其餘建造房屋置備儀器圖書以及一切器具等共需十數萬金初擬勸捐辦理近來商民交困物力艱難似茲鉅款未易集腋而成只能先將節存餘款動用計不敷之數尙多而將來如辦理譯書之費既在常年經費之外卒業學生出洋游學之費亦當預儲於八年之內始有設措之方也得旨該衙門知道○盛宣懷奏時事方殷需才至亟學堂造士由童幼之年層累而進拔茅連茹勢當期以十年欲速圖 朝廷側席之求必先取資於成名之人成才之彥是以有達成館之議也顧非能讀西國之籍不能周知西國之爲而西國語言文字殊非一蹴可幾廿歲以往始行學習豈特不易精嫻實亦大費歲月日本維新之後以編譯西書爲汲汲今其國人於泰西各種學問皆以串有得頗得力於譯出和文之書中國三十年來如京都同文館上海製造局等處所譯西書不過千百中之十一大抵算化工藝諸學居多而政治之書最少且西學以新理新法爲貴舊時譯述半爲陳編將使成名成才者皆得究極知新之學不數年而大收其用非如日本之汲汲於譯書其道無由矣現就南洋公學內設立譯書院一所廣購日本及西國新出之書延訂東西博通之士擇要編譯令師範院諸生之學識優長者筆述之

他若中上兩院長才可日分撥刻輪遞述錄以當學堂編譯之課獲益良多譯成之書次第附刻倘出
書日多卽送蘇浙各局分任刊印以廣流傳所需譯書院經費卽在公學捐款內通融撥用並歸總理公
學之員一手經理以專責成得 旨著照所請辦理○丁丑魏光燾等奏 光緒前准兵部咨會同軍機
處議擬榮祿高燾會同胡燏棻請改武備特科各摺片恭錄 諭旨刊發原奏通行各省會將武備學堂如
何建立如何教練妥議報部等因正核辦間復准部咨議覆黃槐森奏改試洋鎗一摺奉 旨依議欽此
通飭各省按照兩次逐細詳參迅速咨報等因到陝仰見 朝廷整軍經武因時制宜之至意當經咨
會臣爾愷並行司核議去後 等公同參酌往復籌商竊以武科之弊在於所學者非其所急而所取者
非其所用時至今日誠以改鈍爲利化拙爲巧易無用爲有用乃足以建威銷萌克敵致果惟是更張之
始教練爲先則建立學堂乃武科改制之根本顧舊有學堂者易刊立學堂者難風氣已開者易風氣未
開者難地大物博者易地瘠民貧者難陝西僻處西隅民氣渾厚於西法從未有知洋操多所未見謀新
舍舊已費周章而建學之初聘教習置鎗械籌畫常年經費較之文生書院厥費維倍特爲自強計不敢
不勉爲其難雖改絃一旦未免手生而蓄艾三年深虞病劇查胡燏棻原奏府廳州縣各建學堂一所部
議則惟在省會地方設立一區自較簡易第念每縣設學固屬煩難而學堂專在省城他府廳州縣有連

在一二百里外者遠來就學亦殊不易今擬在西安省城設立學堂一處此外則同州鳳翔及南山之漢中北山之延安各設學堂一處凡武舉武生武童願學者由各州縣各就附近之處申送入堂認真教練查郡屬武童歲試自下屆始武鄉會試自光緒二十六年始一律改試鎗礮但童試爲鄉會之始基下屆武童歲考在光緒二十七年而鄉試轉在先一年似嫌倒置現在市議設學應用何等鎗礮部議尙未酌定待學堂設就鎗礮購齊教習到堂武生改業應在二十五年春間而二十六年卽舉行鄉試各武生向以弓刀取進改習鎗礮甫及一年加以風氣初開來者未必多學者未必成於無可挑選之中勉強取中數十名武舉似非實事求是之意擬請將陝西武鄉會試均暫停一屆於二十七年遵用新章開辦小考則技藝漸精而層次亦順至二十九年武闈仍取足兩科之額俾諸生知立法之意非專襲故技精習鎗礮不能進身乃能絕其兩端首鼠之心而精求乎鎗林彈雨之用至練習考核之法臣等公同參議約有四端一曰去我所短仍宜留我所長西人長在鎗礮中國長在擊刺今易弓箭爲鎗礮而刀矛牌究不可廢蓋兩軍對敵鎗礮先施至於敵軍近傷大呼陷陣狼鷄鳥躍虎伏猿進此刀矛牌之利也敵人鎗礮既竭我亦馬軍突出橫擊直前洞脇穿背此又長矛之利也擬將武場刀弓石改爲刀矛牌刀矛仍用湘營操舊法牌則易簾爲鐵用以遮蔽子彈壯其膽氣蓋鎗礮取法於彼雖其精利僅足相敵必肉薄競進

決命爭先方能制勝則刀矛鐵牌實與鎗礮同功一曰器械求新而規矩仍舊自設科以來由縣而府而院三年取進而試之於省技有常格試有常期自明及今遵守勿替今雖改習鎗礮而考試場期擬一仍其舊請將地球馬步箭改試馬步鎗礮爲一場刀矛石改試刀矛牌爲一場數適相當法無大變泰行者既不紛擾應試者更易遵循所謂變而不失其常也一曰器用西式而教用華人陝西風氣初開必得名師指授而地方較遠經費短絀勢難延聘洋員往者陝甘各營改習洋操均由天津揀派員弁入關用資教練今者津江鄂粵學堂林立其間不乏成材擬卽咨商北洋大臣無論營員學生擇其熟精西洋戰法兼通輿地測算諸學者酌派數員來秦作爲教習每一學堂用正副教習各一員延訂十數人卽敷分教但使實事求是數年以後今日之學生卽異時之師長通都之傳習卽鄉曲之楷模薪火相傳武風丕變雖曰因人成事實亦因地制宜一曰立法在考試之中而育材在考試之外查湖北武備學堂專儲將領之選此則爲考試之需用意稍殊按鄂中章程專選文武舉貢生員候補候選員弁官紳世家子弟考取入堂而單門下村不與焉今爲武科改章而設自以成就通省武生武童爲主然果有官場子弟游幕通材有志請纓撫膺思奮者亦准其報名投考收取入堂作爲外課一體認真教授俾成文武之材若有志觀光仍咨送回籍應試蓋此輩聰明學業本加鄉曲武童數等降心來學其志必堅執業既專收效亦速

楚材用管戎臣入秦不當以方隅限也以上所陳在於開風氣節經費求實際立始基先立五學以爲逐漸推廣之由暫停一科以免欲速不達之誚等目擊時艱力除銅習盡其力所能到期於事之有成但使數之七年克收一日之功學者千人能食一士之報由此將才日出我武維揚庶幾上報國家下振士氣得旨該衙門議奏○戊寅兩○諭軍機大臣等振興商務爲富強至計必須講求工藝設廠製造始足以保我利權王文韶面奏粵東商人張振勳在煙臺創興釀酒公司採購洋種葡萄栽植頗廣數年之後當可坐收其利又北洋出口之貨以呢絨羊毛爲大宗就地購機仿造呢羽毯等物亦可漸開利源前經批准道員吳懋鼎在天津籌款興辦等語著榮祿飭令該員吳懋鼎張振勳等即行照案舉辦但使製造益精銷路暢旺自可以暗塞漏卮務令該員等各照認辦事宜切實籌辦以收實效仍將如何辦理情形由榮祿隨時奏報將此諭令知之○諭近來各省商務未見暢興皆由官商不能聯絡遇有鋪商倒閉追比涉訟胥吏需索以致商賈觀望難期起色當此整頓商務之際此種情弊亟宜認真懲辦著各直省將軍督撫嚴飭各該地方官務須體察情形盡心保護凡有倒閉虧空之案應即訊明查追斷追並嚴禁胥吏勒索等弊以儆奸竈而安善良○己卯 上還宮○諭本日御史攀桂呈遞封奏摺內銜名所書舉字係屬何字著明白回奏○庚辰諭裁空餉節餉需爲方今救弊之要圖前經諭令各省體察情形妥

速具奏現據該將軍督撫先後奏陳或裁制兵或裁防勇或裁練軍或稱業經裁併無可再裁當經詳加披閱各省情形雖屬不同但法敝則亟宜變通財匱則尤資補救其已裁者卽著照擬定章程妥速辦理其未裁者仍著再行切實的數總期裁一名空糧卽節一分虛糜空糧裁盡餉項自舒無論水陸各軍一律挑留精壯勤加訓練俾成勁旅並著遵照前降諭旨力行保甲請嚴禁暴相輔而行再能整頓釐金嚴杜中飽富國強兵之計無有亟於此者當茲時事多艱朕宵旰焦勞力圖振作每待臣下以誠而竟不以誠相應各該疆臣身膺重寄具有天良何至誥誨諄諄仍復掩飾支吾苟且塞責耶經此次諄諭之後儻再有仍前敷衍不肯實力奉行經朕查出或別經發覺試問各該大臣能當此重咎否也將此通諭知之○辛巳諭御史宋伯魯奏請將上海時務報改爲官報一摺著管理大學堂大臣孫家鼐酌核妥議奏明辦理○諭御史肇桂奏遵有明白回奏一摺該御史於奏事摺件竟將姓名誤書實屬疏忽肇桂著交部議處○孫家鼐奏查開辦大學堂原奏第五節內云宜在上海等處開一編譯局集中西通才專司纂譯其言中學者舊萃經史子之精要及與時務相關者編之勒爲定本請旨頒行各省學堂悉遵教授庶可以一趨向而廣民智等語又查原奏內云將來學堂日有增益而無所統轄必至各分畛域其弊不可不防伏乞皇上簡派大員管理京師大學堂事務卽以節制各省所設之學堂等語是學堂教育人

才首以研籍爲要而書籍考訂尤不可不精若使書中義理稍有偏歧其關乎學校人心者甚非淺鮮臣
觀康有爲著述有中西學門徑七種一書其第六種幼學通議一條言小學教法深合古人學記中立教
之意最爲美善其第四種第五種春秋界說孟子界說言公羊之學及孔子改制者第八卷中孔子制法
稱王一篇雜引讖緯之書影響附會必證實孔子改制稱王而後已言春秋既作周統遂亡此時王者卽
是孔子無論孔子至聖斷無僭亂之心意卽是後人有此推尊亦何必以此事反復徵引教化天下方今
聖人在上奮發有爲康有爲必欲以衰周之事行之今時竊恐以此爲教人人存改制之心人人謂素
王可作是學堂之設本以教育人才而轉以蠱惑民志是導天下於亂也履霜堅冰臣竊懼之一旦犯上
作亂之人起於學堂之中臣何能當此重咎 皇上旣命臣節制各省學堂臣以康有爲書中凡有關於孔
子改制稱王等字標宜明降 諭旨飭令刪除實於人心風俗大有關係夫經書之在 國朝久經 列
聖欽定未可妄事改纂若謂學者不能遍讀古人原有專經之法至於擇其精粹者讀之如朱子小學之
例亦無不可惟宜由管學大臣因過進呈 御覽 欽定發下然後頒行子史亦然如此則趨向可一民
智可廣而民心庶不致妄用矣 臣愚昧之見謹專摺具陳不勝戰慄屏營之至軍機大臣奉 旨著孫家
鼐傳知康有爲遵照○劉坤一奏上海近來商務日盛各項船隻由海入江以吳淞爲要口祇因攔江沙

淤公司輪船必須起貨轉運致多阻滯現值淞滬鐵路將次竣工商貨往來自必益形繁盛經臣商准總理行門將吳淞作爲海關分卡添建驗貨廠俾得就近起下貨物以順商情並於該處自開商埠准中外商民公共居住飭道會同稅司妥慎籌議將馬路捕房一切工程仿照滬界認真辦理期於商務地方均有裨益俟擇定開辦日期再行咨請總理衙門照會各國駐京公使傳諭洋商一體知照下所司知之○壬午 上幸頤和園詣 慈禧端佑康頤昭豫莊誠壽恭欽獻崇熙皇太后前請安駐蹕○是月美利堅國新簡駐華使臣康格抵任○日本國使臣矢野文雄歸國參贊林樞助代理尋回任

光緒一百四十六

臣朱壽朋敬編

臣潘鴻鼎恭校

六月癸未朔張之洞等奏 臣前准部咨光緒二十四年正月二十二日欽奉 上諭開經濟特科令中外大臣薦舉攷試近日恭讀邸鈔四月二十三日欽奉 上諭股股以變法自強京外設立學堂爲急又讀邸鈔五月初五日欽奉 上諭於下科爲始鄉會歲科各試向用四書文字一律改試策論一切詳細章程該部卽妥議具奏等因欽此際此時事艱危人才匱乏廢頒 明詔破除成格力懲誣陋空疏之習思得體用兼備通達時務之士而任之海內士民見我 皇上處事之明決如此求才之急如此孰不欽仰奮感竊維救時必自求人才始求才必自變科舉始四書五經道大義精炳如日月講明五倫範圍萬里聖教之所以爲教中華之所以爲中實在於此歷代帝王經天緯地之大政關中驛外之遠略莫不由之國家之以四書文五經文取士大中至正無可議者也乃流失相沿官司不善奉行士林習爲庸陋不能佐 國家經時濟變之用於是八股文字遂爲人所詬病今 聖上斷然罷去八股不用固已足振動天下之耳目激發天下之才智特是科舉一事天下學術所繫卽爲 國家治本所關若一切攷試節目

未能詳酌妥善則恐未必能遽收實效而流弊不可不防嘗攷北宋初創爲經義取士之法體裁只如講義文筆亦尙近雅明成化時始定爲八股之式行之已五百年文徇俗而愈卑流積久而愈敝雖設有二場經文三場策問而主司簡率自便惟重頭場時文三三場字句無疵卽已中式遂有三場實止一場之弊今改用策論誠足以破拘攣陳腐之習矣然文章之體不止命題之例不嚴則國家重教之旨不顯取士之格不一多士之趨向不定今廢時文者患八股之纖巧苛瑣浮濫不能闡發聖賢之義理也非廢四書五經也若不爲定式恐策論發題或雜採羣經字句或兼採經史他書界限過寬則爲文者必至漫無遵守徒騁詞華行之日久必至不讀四書五經原文背道忘本此則聖教興廢中華安危之關非細故也竊以爲今日當詳議者約有數端一曰正名正其名曰四書義五經義以示復古其格大略如講義討論經說二曰定題四書義書四書原文五經義書五經原文或全章或數章或全節或數節或一句或數句均可不得刪改增減一字亦不得用其意而改其詞三曰正體以模範說理明白曉暢爲貴不得塗澤浮豔作駢儷體亦不得鉤章棘句作怪澀體四曰徵實准其引徵史書博採羣書但非違悖經旨之言皆得引用凡時文向來無謂禁忌悉與蠲除五曰閑邪若周秦諸子之謬論釋老二子之妄談異域之方言輟說之瑣語凡一切離經叛道之言嚴加屏黜不准闖入則八股之格式雖變而衡文之宗旨仍與真正

之聖訓相符顯猶有慮者文士之能講實學治古文者不多改章之始恐僅能稍變八股之面目不免以時文陳言濫調敷衍成篇若主司仍以頭場爲重則二三場雖有博通之士仍然見遺與變法之本意尙未相符若主司厭其空疏陳腐趨重二三場則首場又同虛設其詭誕浮薄務趨風氣者或又將邪說之說解釋四書五經附會聖道必致離經叛道心術不端之士雜然並進四書五經本意全失聖道既微世運愈否其始則爲惑世誣民之說其終必有犯上作亂之事其流弊尤多爲禍尤烈且明旨開特科設學堂而學堂肄業有成之士未嘗示以進身之階經濟雖並入鄉會場而未議及六科如何分攷之法若非合科舉經濟學堂爲一事則以科目升者偏重於詞章仍無以救迂陋無用之弊以他途進者自外於聖道適足以爲邪說景行之階今宜將一體用以一之法求才不厭其多門而學術仍歸於一是方爲中正而無弊昔朱子當南宋國勢微弱之際憤神州之多難懼救世之無才屢欲改變科舉嘗攷語類中力詆時文之弊者不一而足而究其論科舉積弊之法則曰更須兼他科目取人歐陽修知諫院時惡當時舉人鄙瑣剽盜全不曉事之弊嘗疏請改爲三場分試隨場而去之法每場皆有去留頭場策論合式者試二場二場論合式者試三場其大要曰鄙惡乖誕以漸先去少而易攷不至勞昏全不曉事之人無由而進其說頗切於今日之情事朱子之擬兼他科目猶今之特科經濟大門也歐陽修之欲以策論救

時弊猶今之欲以中西經濟救時文也又查今日定例武科鄉會小試騎射步射硬弓刀石分爲三場皆有去取人數遞刪而遞少技藝遞攷而遞精而磨勘之例以京場刀弓爲重竊謂宜遠師宋歐之論近仿武科之制擬爲先博後約隨場去取之法將三場先後之序互易之而又府遞取之大率如府縣攷復試之法第一場試以中國史事 國朝政治論五道此爲中學經濟假如一省中額八十名者頭場取八百名額四十名者頭場取四百名大率十倍中額卽先發榜一次不取者罷歸取者始准試第二場二場試以時務策五道專問五洲各國之政專門之藝政如各國地理學校財賦兵制商務刑律之類藝如格致製造聲光化電等類分門發題攷試此爲西學經濟其雖解西法而支離狂悖顯背聖教者斥不取中額八十名者二場取二百四十名額四十名者取一百二十名大率三倍中額再發榜一次不取者罷歸取者始准試第三場三場試四書義兩篇五經義一篇取其學通而不離理純而不腐者全校三場均符者始中式發榜如額磨勘之日於三場尤須從嚴如有四書義五經義理辭謬妄離經叛道者士子考官均行黜革如是則取入二場者必其博涉古今明習內政者也然恐其明於治內而闇於治外於是更以西政西藝攷之其取入三場者必其通達時務研求新學者也然又恐其學雖博才雖通而理解未純趨向未正於是更以四書義五經義攷之其三場可觀而中式者必其宗法聖賢見理純正者也大抵首場

先取博學二場於博學中求通才三場於通材中求純正先博後約先粗後精既無迂闊脂陋之才亦無偏駁狂妄之弊三場各有取義以前兩場中西經濟補益之而以終場四書義五經義範圍之較之或偏重首场或偏重二三場所得多矣且分場發榜則下第者先歸二三場卷數愈少校閱亦易寒士無候榜久羈之苦謄錄無卷多錯誤之弊主司無竭蹶草率之虞一舉三善人才必多而蓄重尤在末場猶之府縣試皆憑宋體以爲去取不愈見四書五經之重哉其學政歲科兩攷生童均可以例推之歲科攷例先試經古一場卽專以史論時務策兩門攷思生員歲攷正場原係一四書文一經文卽改爲四書義經義各生員科攷童生攷試一切均同其童試孝經論性理論應仍其舊難者或曰主司罕通新學將如之何不知應試則難試官則易近年上海譯論中外政學藝學之書不下數十種切實者亦當不少闕中例准調書據書攷校似不足以資攷官且房官中通達時務者尙多總裁主攷惟司覆閱尤非難事至外省主攷學政年力多強論有既下以三年之功講求時務豈不足以爲衡文量才之資乎惟是變法之初兼習未久其研求時務者豈能遽造深通是宜甄錄之時稍寬其格以示駿骨招賢之意兩科以後通才碩學自必粲然可觀且登科入仕者漸多則京外攷官房官自不可勝用矣抑臣等之愚更有請者百年以來試場兼重詩賦小楷京官之用小楷者尤多士人多遯中年始成進士甫脫八股之厄又受小楷之困

以至通籍十年之待從年逾六旬之京堂各種攷試仍然不免其所謂小楷者亦不合古人書法姿媚俗書貽譏算子挑剔破體察及秋毫且同一紅格大卷 殿試散館優拔貢 朝攷字體之大小不同同一白摺而 朝攷大致攷差攷御史各項字格之疏密不同紛歧煩擾各有短長 詔令並無明文而朝野沿爲病習故大學士曾國藩奏疏嘗劄切言之夫八股猶或可以覘理解之淺深詩賦則多文而少理詩賦猶可以見文詞之雅俗小楷則有藝而無文其捐志氣耗目力廢學問較之八股詩賦殆有甚焉由是士氣銷磨光陰虛擲舉天下登科入仕之人才歸於疏陋輒熟以至今日遂無以紓 國家之急今旣罷去時文則京官攷試詩賦小楷之舉亦望 聖明奮然釐剔一並掃除查鄉會試之外惟 殿試一場典禮至重自不可廢然 臨軒發策登進賢良自宜求得正誼明道如董仲舒直言極諫如劉蕡者而用之斷不宜以小楷爲去取一經 殿試卽可據爲授職之等差以昭鄭重 朝攷似可從省及通籍以後無論翰苑部曹一應職官皆以講求實學實政爲主凡攷試文藝小楷之事斷斷必宜停免惟當攷其職業以爲進退則已仕之人才不致以雕蟲小技困之於老死俾得汲汲講求強國禦侮之方此則尤切於任官修政之急務者至於詞章書法潤色鴻業乃館閣撰述應奉 朝廷需用此項人員之時特頒 諭旨偶一行之不爲常例略如攷試 南書房攷試中書故事嚴則止及翰詹竟則無論翰詹部屬小京官皆

可與攷視其原有階品分別授官應候請旨裁定與三年會試 殿試取士之通例各不相涉庶幾文學政事兩不相妨矣難者又曰 本朝名臣出於科舉翰林者多矣安見時文詩賦小楷之無益不知登進貴顯限於一途固不能使賢才必出其中抑豈能使賢才必不出其中此乃偶然相值非時文詩賦小楷之果足以得人也且諸名臣之學識閱歷率皆自通籍任事以後始能大進然則中年以前神智精力銷磨於攷試者不少矣假使主文者不專以時文詩賦小楷爲去取所得名臣不更多乎竊謂如此辦法博之以經濟約之以道德學堂有登進之路科目無無用之人時務無悖道之患似此切實易行流弊亦少此舉爲造就人才之樞紐而卽爲維持人心世道之本原臣等憂慮所及不敢不効其一得之愚事體重大猶望 飭下廷臣會議施行不勝悚惶激切之至 上諭張之洞陳寶箴奏請飭妥議科舉章程並酌改攷試詩賦小楷之法一摺鄉會試改試策論前據禮部詳議分場命題各章程已依議行茲據該督等奏稱宜合科舉經濟學堂爲一事求才不厭多門而學術仍歸一是擬爲先博後約隨場去取之法將三場先後之序互易等語朕詳加披閱所奏各節剴切周詳頗中肯綮著照所擬鄉會試仍定爲三場第一場試中國史事國朝政治論五道第二場試時務策五道專問五洲各國之政專門之藝第三場試四書義兩篇五經義一篇首場按中額十倍錄取二場三倍錄取取者始准試次場每場發榜一次三場完畢

如額取中其學政歲科兩攷生童亦以此例推之先試經古一場專以史論時務策命題正場試以四書義經義各一篇禮部卽通行各省一體遵照朝廷於科舉一事斟酌至再不厭詳求典試諸臣務當仰體此意精心衡校以期遴選真才至詞章楷法雖館閣擬撰應奉文字未可盡廢如需用此項人員自當先期特降諭旨攷試偶一舉行不爲常例嗣後一切攷試均以講求實學實政爲主不得憑楷法之優劣爲高下以勵碩學而黜浮華其未盡事宜仍著該部隨時妥酌具奏○乙酉 上還宮○諭現在變通科舉業經准如張之洞陳寶箴所奏更定新章並著禮部詳議條目頒行各省鄉會試考試策論一洗從前空疏浮靡之習殿試一場爲通籍之始典禮至重朕臨軒發策虛衷採納自必遴取明體達用之才嗣後一經殿試卽可量爲授職至於朝考一場著卽行停止朝廷造就人才惟務振興實學不憑楷法取士俾天下翕然向風講求經濟用以備國家任使朕實有厚望焉○丙戌諭都察院奏湖南舉人何鎮圭條陳武試團練並章程據情代奏一摺著兵部歸入變通武科事宜內一併妥議具奏○戊子諭軍機大臣等御史張承繼奏請於五城添立小學堂中學堂一摺著孫家鼐酌核辦理○諭前據孫家鼐奏請將馮桂芬所著校邠廬抗議刷印發交部院等衙門徵議當經諭令榮祿迅速刷印茲據軍機大臣將應行頒發各衙門及擬定數目開單呈覽卽著照單開俟書到後發交各衙門悉心校看逐條嚴誡各附簡明論說分

別可行不可行限十日咨送軍機處彙齊進呈以備垂覽○己丑諭翰林院奏侍講黃紹箕呈進張之洞所著勸學篇據呈代奏一摺原書內外各篇朕詳加披覽持論平正通達於學術人心大有裨益著將所備副本四十部由軍機處頒發各省督撫學政各一部俾得廣爲刊布實力勸導以重名教而杜危言○諭軍機大臣等振興商務爲目前切要之圖疊經諭令各省認真整頓辦理尙無頭緒泰西各國首重商學是以商務勃興稱雄海外中國地大物博百貨浩穰果能就地取材講求製造自可以暗塞漏卮不致利歸外溢著劉坤一張之洞陳瀛通達商務明白公正之員紳試辦商務局事宜先沿江沿海如上海漢口一帶查明各該處所出物產設廠興工果使製造精良自能銷路暢旺日起有功應如何設立商學商報商會各端暨某省所出之物產某貨所宜之製造並著飭令切實講求務使利源日闢不令貨棄於地以期逐漸推廣馴致富強事屬創辦總以得人爲先該督等慎選有人卽著將擬定辦法迅速奏聞毋稍延緩將此各諭令知之○庚寅諭御史韓培霖奏請籌辦倉穀一摺積穀爲民食攸關遇有偏災藉資補救乃各地方官往往不以民事爲重以致所設倉廩半屬有名無實如逢前後任接代恆以銀錢抵交期於簡便一遇荒歉輒請開放賑款留截漕糧復國中飽毫無實惠此風亟應禁革著各督撫嚴飭各府州縣所有倉穀務當認真籌辦實儲在倉其有以銀錢列抵交代者勒限一律買補以備緩急不得陽奉陰

遼虛應故事○孫家鼐奏五月二十九日內閣奉 上諭御史宋伯魯奏請將上海時務報改爲官報一摺著總理大學堂大臣孫家鼐酌核奏明妥議辦理欽此臣竊維明目達聰唐虞之盛德採風問俗三代之隆規自古聖帝明王未有不通達下情而可臻上理者也今之論治者皆以貧弱爲患矣臣竊謂貧弱之患猶小疆圉之患最深該御史請將時務報改爲官報進呈 御覽擬請准如所奏該御史請以梁啟超督同向來主筆人等實力辦理查梁啟超奉 旨辦理譯書事務現在學堂既開急待譯書以供士子講習若兼辦官報恐分譯書功課可否以原有爲督辦官報之處恭請 聖裁抑臣更有請者唐臣魏徵對唐太宗曰人君兼聽則明偏聽則暗泰西報館林立人人閱報其報能上達於君主亦不問可知今時務報改爲官報僅一處官報得以進呈尙恐見聞不廣現在天津上海湖北廣東等處皆有報館擬請飭各省督撫飭下各處報館凡有報單均呈送都察院一分大學堂一分擇其有關時事無甚背謬者均一律錄呈 御覽庶幾收兼聽之明無偏聽之蔽如此則 皇上雖法宮高拱萬里之外如在目前於用人行政似有神益臣謹擬章程三條開列於後一時務報雖有可取而龐雜猥瑣之談夸誕虛誕之語實所不免今既改爲官報宜令主筆者慎加選擇如有顛倒是非混淆黑白挾嫌妄議憤亂 宸聰者一經查出主筆者不得辭其咎一官書局向有彙報係遵總理衙門奏定章程不准議論時政不准臧否人物

皆譯外國之事俾閱者略知各國情形今新開報館既得隨時進呈臚陳利弊將來官書局報亦請開除
禁忌仿陳詩之觀風准鄉校之議政惟各處報紙送到仍仍督飭書局辦事人員詳慎選擇不得濫為印
送一原奏官報經費一節查官書局印報例令閱報者出價惟所售無多故每月經費不足由書局貼
補茲新設官報閱報者自應一體出價擬請將此項官報隨時寄送各省督撫通行道府州縣均令閱看
每月出價銀一兩統十八省一千數百州縣約計每月得價近一千兩常年核算約在二萬四千之譜加
以官商士庶閱報出價計亦可得鉅款於紙墨刷印工本自當游刃有餘可無庸另籌經費惟創設之始
需費必須數千金若在上海開辦或由上海道代為設法可令該員自往籌商 上諭孫家鼐奏遵議上
海時務報改為官報一摺報館之設所以宣國是而達民情必應官為倡辦該尚書所擬章程三條均尙
周妥著照所請將時務報改為官報派康有為督辦其事所出之報隨時呈進其天津上海湖北廣東等
處報館凡有報單均著該督撫咨送都察院及大學堂各一分擇其有關時務者由大學堂一併呈覽至
各報體例自應以指陳利弊開擴見聞為主中外時事均許據實昌言不必意存忌諱用副朝廷明目達
聰勤求治理之至意所籌官報經費即依議行○辛卯 上詣 奉先殿 壽皇殿行禮○以吳承瑞為
福建布政使陸元鼎為江蘇按察使○壬辰諭譚鍾麟許振祿電奏派營援剿梧州鬱林先後獲勝等語

前因廣西土會各匪肆行滋擾梧州之容縣失而旋復賊衆數萬勢甚蔓延迭經電諭譚鍾麟等派營會剿茲據奏稱東軍冒暑晝夜馳赴廣西先解岑溪藤縣之圍一面分援梧州鬱林道員潘培楷會同總兵劉邦盛一軍分援博白均經獲勝餘賊敗竄鬱林我軍跟蹤追剿鏖戰逾時將士用命賊不能支紛紛逃潰鬱林立解興業北流亦於五月廿七廿八等日先後克復總兵潘瀛聯合鄉團於三十日收復陸川方桂東莫善積等營行至石城適遇敗匪竄踞崗頭迎頭截剿均已散逸遂趕赴鬱林同剿餘賊計可剋期撲滅其鄰郡各匪現經改槐森蘇元春派隊會圍分投剿捕不難次第盪平此次廣西土會各匪事起倉猝經譚鍾麟派營兵會同廣西營勇分路進攻所向克捷兼旬之內收復三城立解四城之圍剿辦尙爲迅速仍著譚鍾麟等嚴飭派出各營一體認真搜捕餘匪務須淨絕根株毋留餘孽並將剿辦情形隨時電奏以慰廑系○盛宣懷奏恭閱邸鈔光緒二十四年五月初八日內閣奉 上諭前因廣漢開辦鐵路設立招商公司特派盛宣懷督辦計時將及兩年所有勘路購地各事宜應已辦有端緒此項鐵路關係緊要豈容觀望遲延現在業已籌有的款著盛宣懷剋日興工趕辦並將辦理情形先行具奏倘再延不開辦玩誤要工責有攸歸盛宣懷豈能藉此自咎耶此外粵漢甯甌各路並著承辦各員一體迅速開辦毋得任意遲緩欽此仰見 聖主以幹路爲重要策勵責成嚴申 訓誡俾海內咸環視易聽曉然於

朝廷先務之所急圖功之奮迅跪聆之下感悚交深伏查蘆漢幹路臣於光緒二十二年九月奉命會同直隸督臣王文韶湖廣督臣張之洞辦理是年十月 陛辭出都十一月由天津航海至滬當將開辦蘆溝橋至保定府一段工程並在上海設立鐵路總公司先後奏報二十三年三月在漢口工次籌辦漢口通北勘路購地各事又將幹路先後次序操縱機宜會摺密陳並請發准借官款聲明蘆保業經興築淞滬亦在開工此兩段來年均可造成九月間又將幹路由楚入豫詳勘襄樊信陽兩道比較便利會摺請 旨遵行聲明北端蘆保一段土工已竣料物陸續運購到工年內外可開車運料一面派員續籌保定至正定一段實地事宜南端漢口至孝感一段已儲備木石各料墊造造橋均仰荷 飭下戶部總理衙門議行在案綜計開辦以來一年有半臣無日不督飭華洋員司分頭勘路按圖購地購求料物催趨工作並在津漢各設鐵路專門學堂及預籌製造各廠不敢稍涉遷延今蘆保已開車運料年內全工可竣淞滬月內告成漢口滬口間外江內湖數十里工最艱鉅夏漲以前鑿石築土亦皆戡事幸與前奏均符然保定通南瀋口通北未能兼程並進者則籌款之周折而事變之不及料也總公司原以招集商股為歸宿但華商須待工成利見而後來 臣經辦輪船電報前事不忘近如昭信股票以 明詔之剴切官吏之勸諭所得者自服官之人及官方可及之號當各商外商民買票寂乎罕聞者可與樂成難與圖

始之明諭臣說帖原議故先官欸次洋價而商股後為蘆漢議准借撥部欸一千萬嗣會奏請發戶部先撥四百萬連南北洋官欸三百萬支付蘆保松滬漢鐵三段工用業已告罄臣維路工的欸必資洋價而遲速難易之權操於出借之人且洋商與中國議借欸明餌暗索向多以利為誘臣與王文韶張之洞商定議借路欸首除斯弊惟我既無私利之心當多爭公中之利彼不能挾制於後愈不肯遷就於前初與美商議病其所索極利過多繼及英商相去不遠臣以事關數十年之利害深慮借欸喫虧還欸不易筆禿唇焦未敢遽定上年春間馳赴武昌與張之洞面決機宜遇有比商瑞西等介漢口比領事就議持向與英美力爭數大端相要比商皆允如議張之洞與臣密商比以鋼鐵工作著名國小而無大志借用比欸利多害少遂會英美而就比兩次定約均達天聽至正月首次交欸之期比國派人來滬備言膠州之事大局震動且國債以鹽課釐金抵押歸稅務司管理於前訂之蘆漢借票相形見絀無人肯受另送續約條款要索甚多屢駁屢改拖延數月至與廢約罷議而後轉圖速五月初七日始與畫押其間委曲艱難情形隨時皆與總理衙門王大臣及直隸湖廣督臣往返電商迄於無可讓減方與定議並已會同專奏皆在聖明洞鑒之中比國總工程師毓員德赴漢口查勘已做各工訂定頭批借欸到華即行接續續辦由楚入豫節節前進保定以南迄於黃河北公司必須俟來年續付借欸方能接造然圖地築土

皆當先期趕辦俟續發部款尅日分段購築約計一年道工堅實此款續到接造北段庶幾工無停待一氣呵成臣令該總工程師另立文憑除黃河橋工外如無意外耽擱款不中輟限令三年竣工行車粵漢一路自鄂至湘業經督撫臣派員會同總公司派出之員前往查勘大略並曉諭一切惟粵省尚未准委員會勘美款甫定草約而西班牙開戰美公司稍有所待昨接駐美使臣伍廷芳來電該公司派人過夏後來華勘估全工須俟勘定議立正約即可分頭開工美國路工甲於各國諒無就延滯寧一路英國工程師勘估大概將竣正約一定開辦必速以今日中國之勢借外國之款而又要之以商借商還絕無實抵不待智者而知其難也紆迴年餘鉤心鬩角三路之款次第就範卽三路之工操券可成此皆仰賴國家之護持王大臣之指示非臣一人筆舌之勞所能幸致至於造路以費省工速爲主臣初任事亦欲僱用洋工程師任我指使而不假以事權無如中國員司就使皆精白乃心究竟事非諳習華人苦工師之多方挑剔工師皆華人之辦理兩歧常致欲速而反遲求省而轉費是以獨排羣議與立約各洋商堅明約束酌訂限期借用某國之款卽訂用某國總工程師代爲營造年限之內其事權略如海關稅務司一切購料辦工用人理財悉資經理仍事事預請總公司核定而後行此後三路同舉合同內皆限以款到之日爲始三年竣工臣前與王文韶張之洞會奏蘆漢粵漢合爲一氣竭五六年之苦功當可使南北

幹路相爲銜接以符原議等語蓋三路係分三國借款營造緊約寬期互相比較則一成而無不成也惟臣德薄能鮮憂畏譏雖竭盡心力爲之恐難勝此艱鉅必需遴舉賢能各專一路之任與各國工程師按約辦理而以總公司挈其綱領綜其大成又必恃各省督撫臣體國公忠同心協力庶幾事無阻格依期蒞工上紓聖主宵旰之勤下免微臣貽誤之咎大局幸甚微臣幸甚上諭軍機大臣等盛宣懷奏籌造南北鐵路辦理情形一摺覽奏均悉所稱三路分三國借款營造緊約寬期互相比較洵爲扼要之論並滌陳委曲艱難各節亦屬實在情形惟是作事謀始必須力任其難不辭勞怨方能日起有功該大臣膺茲重任務當力持定見與各洋商堅明約束會同榮祿張之洞迅速籌辦使三路合爲一氣南北相爲銜接提綱挈領勿分畛域以期旬日觀成毋得任意推諉空言搪塞致負委任將此諭令知之○盛宣懷奏光緒二十二年九月欽奉 寄諭准設鐵路總公司令盛宣懷督辦從蘆漢辦起蘇滬粵漢亦次第擴充仍著王文韶張之洞督率興作等因欽此伏查直隸爲幹路根本之地北洋尤中外樞轂所踴現在王文韶已蒙 內用榮祿以便相接任公忠克實副綱紀四方之望所有鐵路總公司辦理蘆漢滬甯粵漢各路相應籲懇 特派榮祿循案督率籌辦俾微臣隨時隨事有所咨承庶得竭其駑鈍成此鉅工上諭蘆漢等處鐵路著榮祿會同張之洞督率籌辦○癸巳諭軍機大臣等國家講求武備非添設

海軍籌造兵輪無以爲自強之計茲經召見裕祿詢以福州船廠情形據奏工匠機器一切均足以資興造惟所需款項較鉅必須於原撥常年經費以外另籌的款按年撥解庶足備製造船廠之用著各該將軍督撫遵照單開指撥數目妥議辦理方今時勢艱難朕宵旰焦勞力求振作思禦外侮則整軍經武難再視爲緩圖各該將軍督撫受恩深重高目時艱亦當仰體朕懷協力同心先其所急當此度支匱乏難於挹注惟有於無可設法之中力籌撥濟如撥金之剔除中飽局務之酌量歸併皆當破除情面實力籌維倘指款實有不敷除應解各項京餉暨應還洋款不准擅動外其餘無論何款准其移緩就急如數撥解不准託詞延宕國計安危所繫我君臣總宜相感以誠同維大局用副朕殷殷訓誥之至意仍將遵辦緣由於接奉此旨十日內先行電奏以慰廑系原單著鈔給閱看將此各諭令知之○諭李端棻奏各省學堂請特派紳士督辦等語現在京師大學堂業經專派管學大臣尅日興辦各省中學堂小學堂亦當一律設立以爲培養人才之本惟事屬創始首貴得人著各該督撫就各省在籍紳士中選擇品學兼優能孚衆望之人派令管理各該學堂一切事宜仍隨時稟承督撫認真辦理該督撫慎選有人卽著奏請派充以專責成而收實效○諭李端棻奏請刪改則例等語各衙門咸有例案勒爲成書輯若畫一不特易於遵行兼可杜吏胥任意准駁之弊法至善也乃閱時既久各衙門例案太繁堂司各官不能盡記吏

胥因緣爲奸舞文弄法無所不至時或會例引案尤多牽混附會無論或准或駁皆恃例案爲藏身之固
是非大加刪訂使之歸於簡易不可著各部院堂官督飭司員各將該衙門舊例細心紬繹其有語涉兩
歧易滋弊混或貌似詳細揆之情理實多窒礙者概行刪去另定簡明則例奏准施行一切舊例不得再
行牽涉尤不得藉口無例可援濫引成案致啟弊端如有事屬創辦不能以成例相繩者准該衙門隨案
據實聲明請旨辦理仍按衙門繁簡立定期限督飭司員迅速辦竣具奏將此通諭知之○甲子諭近因
各省裁汰營勇保衛地方全在嚴查保甲以輔兵力之不足各省辦理保甲章程未必詳備迭經諭令各
督撫從嚴稽察率皆視爲具文並未將現辦情形詳晰覆奏殊屬因循廢弛自此次申諭之後各該督撫
務當嚴飭地方官於保甲一事實力舉行以期民情固結奸宄無從匿跡仍將整頓辦法先行切實具奏
以副朕綏靖閭閻至意○鄭思賢奏 朝廷創辦經濟特科約以大事由三品以上京堂及督撫學政各
舉所知無論已仕未仕俱准咨送攷試引 見聽候 擢用欽奉 諭旨時勢多艱需才孔亟該大臣等
如有平素所深知者出具切實攷語咨送不得瞻徇情面徒採虛聲等因欽此本年正月二十七日奉
上諭國家登進人才必須言行相符而後可收實效況經濟一科係屬特設內外臣工尤當仰體破格旁
求之意不得以有才無行之人濫登薦牘等因欽此仰見 皇上旁求俊彥慎重精詳之至意欽服莫名

願朝廷求才愈殷而後下之所以應之者愈急往往輕爲薦舉不免博探虛聲受人干求遂致瞻徇情面甚且有不肖之徒藉爲進身捷徑賄賂夤緣皆所不免以 朝廷破格旁求之盛典而使有才無行之人濫竽充數欲廣登進之路適開倖進之門若非嚴定濫保處分何以祛禍弊而儆效尤查吏部處分則例原有濫保不實之條擬請 旨飭下京外大臣保送經濟特科人員經攷試引 見錄用以後如有言行不符以及干求賄賂劣跡一經查出或被入糾參除將本員立予罰黜嚴加懲處外並將原保之大臣照濫保罪人之例交部議處以示懲儆庶幾真才可得而特科盛典愈昭鄭重矣 上諭御史鄭思賢奏特科大典請嚴定濫保處分一摺經濟特科之設朝廷原期拔取真才以備賢良之選非爲倖進之途開營謀之路中外臣工例得保送特科者務當屏除私心汲引善類於所保之人學問才具灼見真知始可登諸薦贖不得瞻徇情面一經查出定將原保大臣從嚴懲處○乙未 上幸頤和園詣 慈禧端佑康頤昭豫莊誠壽恭欽獻崇熙皇太后前請安駐蹕○刑部右侍郎龍湛霖因病乞休允之○丁酉以梁仲衡爲刑部右侍郎○諭戶部奏候補主事李經野以山東辦理股票實係苛派請旨飭查據呈代奏一摺前因安邱縣辦理股票有苛派擾民情事曾經諭令張汝梅確查具覆茲據該主事呈稱該縣擬奏不實流弊愈滋並歷指當日辦理情形懇請除去計頃按畝之弊等語昭信股票願借與否本屬聽民自便若

計畝攤派仍不免抑勒之弊著張汝梅通飭合屬懷遵迭次諭旨斷不准稍有苛派並將該主事指飭各節確實查明據實覆奏不准稍有迴護○諭朝廷整飭吏治不啻三令五申乃各省大吏往往粉飾因循於所屬各員不肯認真考察以致賢者無由各盡其長不肖者得以自匿其短甚至案關吏議尙不免巧爲開脫誤國病民皆由於此著各省督撫嗣後於屬員中務當嚴加考核賢能者卽行臚陳政績保薦擢用其曠廢職事營私舞弊之員隨時分別奏參立予黜革經此次申諭後各該督撫身膺重寄尙其振刷精神秉公舉劾以期吏治日有起色毋負諄諄誥誡之至意○諭通商惠工務材訓農古之善政方今力圖富強業經明諭各省振興農政獎勵工藝並派大臣督辦沿江等處商務惟中國地大物博若不開通風氣不足以盡地力而闢利源國治之法以農爲體以工商爲用現當整飭庶務之際著各省督撫認真勸導紳民兼採中西各法講求利弊有能創製新法者必當立予優獎該督撫等務當仰體朝廷開物成務之意各於該管地方考察情形所有頒行農學章程及製造新器新藝專利給獎並設立商務局選派員紳開辦各節皆當實力推廣俾有成效此外迭經明降諭旨飭辦事宜亦均悉心講求次第興辦毋得徒託空言一奏塞責並將各項如何辦理情形隨時具奏將此通諭知之○諭朝廷振興庶務不厭講求所賴大小臣工各抒讜論以備採擇著翰林院詹事府都察院各於值日之日由該堂官輪派請讀編

檢八員中發二員科道四員隨同到班聽候召見藉收數奏以言之益其部院司員有條陳事件者皆由
各堂官代奏士民有上書言事者著赴都察院呈遞毋得拘牽忌諱稍有阻格用副題言必察之至意○
諭鐵路礦務為時政最要關鍵現在津榆津蘆鐵路早已工竣由山海關至大凌河一帶亦籌款接辦大
段已具礦務如開平漠河兩處辦理最為得法成效已著現在一律推廣惟礦路事務繁重誠恐各省辦
法未能畫一或致章程歧出動多窒礙而宜設一總匯之地以一事權著於京師專設礦務鐵路總局特
派總理各國事務大臣王文韶張蔭桓專理其事所有開礦築路一切公司事宜但歸統轄以專責成○
劉坤一等奏烏匪黑面施老窩子前在蘇浙邊界廣招徒黨擾害閭閻與軍必責且為黨援各紳姓長而
實皆該匪為之主謀所犯聚賭販私等案行劫凶殺日張甚至抗拒官軍殺傷兵勇種種悖逆實屬罪不
容誅迭奉 寄諭飭令蘇浙兩省會同辦理坤一等據報趙舒通浙江巡撫廖壽豐密飭各營合
力兜捕各匪黨多名其黨必責並夥黨白面施老窩子管老窩子經趙舒通先後拿獲訊明正法並經
廖壽豐拿獲土康南董必責余老窩子等數名從嚴懲辦均經奏報在案首匪黑面施老窩子屢飭嚴拿
未獲臣奎俊上年兩次 召見面奉 聖訓諭令嚴拿到任後密飭文武員弁購覓眼線分投偵緝屢被
兇脫往往功敗垂成嗣探得該匪潛回合肥縣原籍遁跡深山各員弁跟蹤追捕過之使出該匪自知黨

羽已散窮促無歸換名李得標遁赴天津蘆臺一帶藉以藏身蓄意重結死黨希圖再聚經管帶蘇防前營知府朱上洲探悉蹤跡密稟前來當卽密飭該員會同管帶飛划公游擊歐陽成松等酌帶員弁勇緹航海赴津於四月二十二日在天津蘆臺相近之漢沽地方將該匪拿獲臨拿之際該匪猶敢拚死格鬪各員弁奮力圍捕始得就擒於二十六日由輪船押解回蘇當經發交臬司親提審訊該匪語多狂悖未便稍稽顯戮卽飭照章正法傳首犯事地方懸桿示衆業將大略情形電請總理衙門先行代奏在案竊念江浙島匪滋擾百姓受害無窮茲幸殲厥渠魁實足以快人心而消兩省隱患至前次拿獲蘆必貴出力人員仰蒙 恩旨獎勵此次隔境捕獲匪首各員弁南北奔馳備嘗艱險實屬異常出力合無仰懇天恩准予擇尤保獎數員以示鼓勵出自 逾格鴻施得 旨准其擇尤酌保數員毋許冒濫○戊戌上選宮○己亥諭崑岡等奏永定門城樓失去礮位請將弁兵分別懲處一摺著步軍統領衙門順天府五城一體嚴緝竊犯務獲究辦○孫家鼐奏本月初六日 接到軍機大臣交 旨御史張承繼奏請於五城添立小學堂中學堂一摺著孫家鼐酌核辦理欽此查原奏大意以京師大學堂額數五百名附小學堂額數八十名大學堂皆已經入仕之員小學堂皆大學堂子弟八旗世職武職後裔此外就近願學者均未議及欲於五城添立小學堂中學堂俾土著之人與外省在京之舉貢生監及京官子弟一體入

學此培養人才講求實學之至意也臣查總理衙門原奏章程當時倉猝定議只能舉其大端其詳細節目本末周備臣亦欲推廣此項京官子弟舉貢生監之在京與本籍土著者臣前奏派分教習數人正欲使教此項人員及大員子弟八旗世職武職後裔之年輕者只以草創之始頭緒紛繁尙未能條分縷晰詳細奏明今該御史請於五城各立學堂自應遵照辦理臣愚以爲五城皆地面官與外省有地方之責者無異學堂經費之優絀規制之大小應由五城御史自行籌畫近年刑部候補主事張元濟戶部候補郎中王宗基皆自行籌設創立學堂肄業者頗稱踴躍蓋聖心所向天下從風卽如國家往時以科舉取士海內士人家絃戶誦並無事官爲督率莫不爭自濯磨今五城設立學堂請卽飭下五城御史設立勸辦應否暫借廟宇及將來建立學會之處均由五城御史隨時斟酌定能日起有功至順天府地方臣原有設立小學堂之意因經費未齊是以暫緩金臺書院改課亦應改定章程臣當與府尹臣胡燏棻籌商辦法上諭孫家鼐奏議覆五城添設小學堂請飭設法勸辦一摺京師現已設立大學堂其外學堂亦應及時創立俾京外舉貢生監等一體入學廣爲造就以備升入大學堂之選著五城御史設法勸辦務期與大學堂相輔而行用副培養人才之至意其大學堂章程仍著孫家鼐條陳續析迅速妥議具奏○庚子諭連順奏蒙古王公等報効銀兩可否照章獎敘並卡倫總管等報効銀數各摺片前因國

車兩盟蒙古王公及哲布尊丹巴呼圖克圖沙畢喇嘛等報効銀二十萬兩當經諭令歸入昭信股票辦理茲據該王公再三陳懇不願領票具見急公奉上之忱深堪嘉尚著理藩院會同戶部照章核給獎敘該卡倫總管等所捐銀兩亦著一併給獎嗣後各處奏報捐助昭信股票銀兩者仍著歸入股票章程一律辦理○辛丑子故察哈爾副都統依崇阿祭葬○諭英美日本各埠僑寓華民眾多羣居錯處不乏可造之才亟應設立學堂兼肄中西文字以廣教育著出使大臣等體查情形妥為勸辦議定章程詳晰覆奏○戶部奏大理寺少卿盛宣懷奏籌辦中國通商銀行次第開設情形一摺光緒二十四年五月十九日奉 批諭戶部速議具奏欽此欽遵由軍機處鈔交到部據原奏內稱中國銀行節經招集紳商備足股本參照西國銀行成法議擬章程自光緒二十三年四月二十六日開辦上海總行自夏徂冬天津漢口廣州汕頭煙臺鎮江等處分行陸續開設京城銀行上年亦已開辦至各行省都會亦當逐漸分設近年金磅翔貴銀幣低壓如上海通商總匯之區而銀根空乏商情岌岌皆有不可終日之危幸通商銀行主持市面銀息雖昂猶有限制得以勉為支拄中國銀行規模草創故裨補於商務者必由漸而來蓋山仿辦於各國銀行在華開設之後如匯豐之設已三十餘年根柢已深不特洋商款項往來網羅都盡即華商大宗貿易亦與西行相交日久信之素深中國銀行新造之局勢力未充非可驟與西人爭勝故原

議以慎始圖終積小成大爲宗旨今創辦一年始基已立自此擴充中土之商利收回自有之利權其樞機必視京外撥解官款是否皆歸通商銀行爲旋轉若各省關存解官款仍循舊轍專交私家之銀號絕不與泰 旨設立之銀行相涉則商政之體全失西人騰笑華人增疑海內商情孰肯信嚮所關於通商大局非小查銀行於 國家有無形之利有有形之利氣脈流通交易便易利在無形餘利息厚歸公愈多利在有形非恃 國家主持於上公忠宏遠之督撫藩司各關監督維持於下無以徐收兩利宏此遠謨合無仰懇 飭下戶部通行各省關嗣後凡存解官款但係有中國通商銀行之處務須統交銀行收存匯解以符事體而樹風聲及其成效大著則如昭信股票以及造路開礦凡有招股之事皆可仿照西國歸於銀行代辦收之官力號召自無扞格猜疑之弊等語 等伏查中國通商銀行前據大理寺少卿盛宣懷建議創設當由 臣部借撥官款一百萬兩按年生息業於上年四月間在上海開辦總行茲復據該京卿奏稱天津漢口廣州汕頭煙臺鎮江等處分行陸續開辦京城銀行本年亦已開辦請 飭戶部通行各省關嗣後凡存解官款但係有中國通商銀行之處務須統交銀行收存匯解等因查銀行之設係分商人之利益而使之流通非攬天下之利權而歸其壟斷果能慎選總董妥爲經理如原定章程所擬京外撥解之款交銀行匯兌可以減省匯費公中備用之款交銀行生息可以有益國帑而又事事矢

以信實出以公平久之上下相孚官民交維自足及招徠而通聲氣現在各處分行開辦伊始速令各省
關凡解存官款統交銀行收存匯解無論人不相信未便強以所難亦恐跡近把持於市面商情多有窒
礙惟是各省關解存官款若如原奏所稱專交私家銀號絕不與銀行相涉則是公家所開之銀行公家
先不相信又安望商民之共信殊非 國家所以維持銀行振興商務之意臣等公同商酌擬令該京卿
將銀行收存官款如何滋生利息匯兌如何議減匯費先與各省關商訂明確務較私家銀號錢莊尤爲
妥實省便庶幾羣情翕服號召無難仍請 旨飭下各省將軍督撫暨各關督嗣後凡有通商銀行之處
所有各項官款卽匯解京協各餉向交商號匯兌者如查明改交通商銀行仍不至受虧匯費尙可輕減
卽酌交通商銀行妥慎辦理以重商務仍令各就各省情形分別奏明辦理得 旨如所議行○甲辰諭
軍機大臣張汝梅奏烏匪童振清在東豫交界朱家集嘯聚起事曾經東豫各軍會同地方將童振清拿
獲所有此股逸匪據稱竄於江南礪山等處難保不四出蔓延著劉坤一奎俊張汝梅劉樹堂等迅卽派
兵一體兜拿務期搜除淨盡以絕根株○諭旨今時局艱難欲求自強之策不得不奮發圖新前因中外
臣工半多墨守舊章曾經剴切曉諭勗以講求時務勿蹈宋明積習醇諄訓誡不啻三令五申惟是朝廷
用意之所在大小臣工恐尙未盡深悉現在應辦一切要務造端宏大條目煩多不得不裒集衆長折衷

一是遇有交議事件內外諸臣務當周諮博訪詳細討論毋緣飾經術附會百義毋固執成見隱便身圖
倘或面從心違希冀敷衍塞責致令朝廷實事求是之意短其本有甚非朕所深望於諸臣也總之中國
現在病在痿痹積弊太深諸臣所宜力戒卽如陳寶箴自簡任湖南巡撫以來銳意整頓卽不免指摘紛
乘此等悠悠之口屬在摺紳倘仍隨聲附和則是有意阻撓不顧大局必當予以嚴懲斷難寬貸至於襄
理庶務需才甚多上年曾有考試各部院司員之諭著各該堂官認真考察果係有用之材卽當據實臚
陳候朕錄用如或闕茸不職亦當立予參劾毋令濫竽當此時事孔棘懿後懲前深維窮變通久之義創
辦一切實其萬不得已之苦衷用再明白申諭爾諸臣其各精白乃心力除癰蔽上下以一誠相感庶國
是以定治理蒸蒸日上朕實有厚望焉○諭前據孫家鼐奏遵議上海時務報改爲官報派康有爲督辦
其事並據廖壽恆面奏嗣後辦理官報事宜應令康有爲向孫家鼐商辦當經諭令由總理衙門傳知康
有爲遵照茲據孫家鼐奏陳官報一切辦法報館之設義在發明國是宣達民情原與古者陳詩觀風之
制相同一切學校農商兵刑財賦均准臚陳利弊藉爲紹鑠之助兼可編譯各國報章以備官商士庶開
擴見聞其於內政外交裨益非淺所需經費自應先行釐定以爲久遠之計著照官書局之例由兩江總
督按月籌撥銀一千兩並另撥開辦經費銀六千兩以資布置各省官民閱報仍照商務例價著各督撫

通核全省文武衙門差局書院學堂應閱報單數目移送官報局該局卽按期照數分送其報價著照湖北成案籌款墊解至報館所著論說總以昌明大義抉去癰蔽爲要義不必拘牽忌諱致多窒礙泰西律例專有報律一門應由庫有爲詳細譯出參以中國情形定爲報律送交孫家鼐呈覽○孫家鼐奏本月十七日臣議擬建立小學堂中學堂一摺奉 旨著五城御史設法勸辦與大學堂相輔而行用副培養人才之至意其大學堂章程仍據孫家鼐條分縷析迅速妥議具奏欽此○維學堂創辦之初千端萬緒其章程原難倉猝定議遽臻美備卽日本初設學堂至今二三十年章程幾經變易不厭精益求精況我國家政令更新之始京師首善之區草昧經綸動關久遠尤須規模宏闊條理詳備始足開風氣而收實效臣每日會集辦事各員公同敷議雖不在學堂辦事之人亦多方咨訪廣益集思總期受以虛心任以實事持以公心矢以誠意附取衆長折衷一是以仰副 皇上作育人才振興國勢之至意茲將現擬籌辦大概情形分條開列恭呈 欽定 一進士舉人出身之京官擬立仕學院也由科甲出身中學堂已通曉其入學者專爲習西學而來宜聽其習西學之專門至於中學仍可精益求精任其各占一門派定功課認真研究每月攷課朋友講習日久月長其學問之淺深造詣之進退同堂自有定論臣亦隨時攷驗其人品學術分別辦理仕優則學以期經濟博通 一出路宜籌也凡學堂肄業之人其已經授

職者由管學大臣出具致請各就所長請 旨優獎其作為進士之學生亦由管學大臣嚴敷品學請
行錄用擬採湖北巡撫譚繼洵之議學政治者歸吏部學商務礦務者歸戶部學法律者歸刑部學兵制
者歸兵部及水陸軍營學製造者歸工部及各製造局學語言文字公法者歸總理衙門及使館參隨終
身選轉不出原衙門俾所學與所用相符冀收實效 一中西學分門宜變通也查原奏普通學凡十門
按日分課然門類太多中才以下斷難兼顧擬每門各立子目仿專經之例多寡聽人自認至理學可并
入經學爲一門諸子文學皆不必專立一門子書有關政治經學者附入專門聽其擇讀又專門學內有
兵學一門查西國兵學別爲一事大率專隸於武備學堂又聞日本使臣問答亦云兵學與文學不同須
另立學堂不應入大學堂內擬將此門裁去將來或另設武備學堂應由總理衙門酌覈請 旨辦理
一學成出身名器宜慎也查原奏小學中學大學堂肄業人員卒業領憑遞升作爲生員舉人進士在
國家鼓勵人才原不惜破格之獎然冒濫情弊亦不可不防似宜於鼓勵之中仍示限制應如何嚴定額
數與認真攷覈之處應照原奏會同總理衙門禮部詳擬請 旨 一譯書宜慎也查原奏開一編譯局
取中西博通學盡人所當習者悉編爲功課書分小學中學大學三級量中人之才所能肄習者每日定
爲一課謹按先聖先賢著書垂教精粗大小無所不包學者各隨其天資之高下以爲造詣之淺深萬難

強而同之若以一人之私見任意刪節割裂經文士論必多不服蓋學問乃天下萬世之公理必不可以一家之學而範圍天下昔宋王安石變法創為三經新義頒行學官卒以禍宋南渡後旋即廢斥至今學者猶詬病其書可為殷鑒愚以為經書斷不可編輯仍以列聖所欽定者為定本即未經欽定而舊列學官者亦概不准妄行增減一字以示尊經之意此外史學諸書前人編輯頗多善本可以擇用無庸急於編纂惟有西學各書應令編譯局迅速編譯一西學擬設總教習也查原奏有中總教習無西總教習立法之意原欲以中學統西學惟是聘用西人其學問太淺者於人才無所裨益其學問較深者又不甘小就即如丁韋良曾在總理衙門充總教習多年今若任為分教習則彼不願擬用丁韋良為總教習總理西學仍與訂明權限其非所應辦之事概不與聞一專門西教習薪水宜從優也聞日本使臣問答謂聘用上等西教習須每月六百金然後肯來丁韋良所言亦同今丁韋良自以在中國日久亟望中國振興情願照從前同文館每月五百金之數充大學堂西總教習至西人分教習薪水亦擬照原奏之數酌加一膏火宜酌量變通也臣訪詢西教習丁韋良據云泰西大學堂來學者皆出脩脯極貧者始給紙墨從無月給膏火辦法蓋以圖膏火而來學者必非誠心向學出資來學乃真心有志於學者也臣又觀總理衙門章京與日本使臣論學堂事宜與丁韋良所言大略相同今者國家專講立之

不令學生出資已屬格外之仁似不必更糜鉅費擬仿西國學堂之例不給膏火但給獎賞其如何發給之處應俟開辦後詳細斟酌辦理 以上八條分晰陳恭候 訓示此外未盡事宜當查取東西洋各國學校制度暨各省現辦學堂章程體察情形詳慎斟酌一俟擬議就緒即當奏陳至暫假房舍是否由承修王大臣查勘修理抑由內務府修理應候 欽定惟房舍一日不交即學堂一日不能開辦擬請飭催趕辦以期早日竣工學務得以迅舉仰慰 宸廑 上諭孫家鼐奏籌辦大學堂大概情形一摺所擬章程八條大都參酌東西洋各國學校制度暨內外臣工籌議與前奏擬定辦法間有變通之處縷晰條分尚屬妥協造端伊始不妨博取眾長仍須折衷一是即著孫家鼐按照所擬各節認真辦理以專責成其學堂房舍業經准令暫撥公所應用交內務府量為修葺著內務府剋日修理交管理大學堂大臣以便及時開辦毋稍延緩另片奏議撥給事中鄭思賢奏推廣學堂月課章程請將額滿之員按月甄別等語著依議行惟茲事體大必須精益求精務臻美善所有一切未盡事宜及時體察情形妥籌具奏至派充西學總教習丁建良據孫家鼐面奏請加鼓勵著賞給二品頂戴以示殊榮○乙巳諭中國創建水師歷有年所惟是制勝之道首在得人欲求堪任將領之才必以學堂為根本應如何增設學額添設教練船講求駕駛諳習風濤以備異日增購戰船可期統帶得力著南北洋大臣沿江沿海各將軍督撫一體

實力籌辦妥議具奏至鐵路礦務爲目今切要之圖造端伊始應設立學堂預儲人才方可冀收實效
所有各處鐵路扼要之區及開礦省分應行增設學堂以實舉辦之處著王文韶張蔭桓悉心籌議奏明
辦理○諭軍機大臣等歐洲通例凡通商口岸各國均不得侵佔現當海禁洞開強鄰環伺欲圖商務流
通囑杜覬覦惟有廣開口岸之一法三月間業經准如總理各國事務衙門王大臣奏將湖南岳州福建
三都澳直隸秦王島開作口岸嗣據該衙門議覆中允黃思永條陳謂各省察看地方情形擬設口岸現
在尙無成議著沿江沿邊各將軍督撫迅就各省地方悉心籌度如有形勢扼要商賈輻輳之區可以推
廣口岸展拓商埠者卽行咨商總理衙門辦理惟須詳定節目不准劃作租界以均利益而保事權該將
軍督撫等籌定辦法卽著迅速具奏○戊申萬壽聖節 上詣 寧壽宮 慈禧端佑康頤昭豫莊誠壽
恭欽獻崇熙皇太后前行禮○御乾清宮受賀○己酉以聯元爲安徽按察使○庚戌 上詣 大高殿
壽皇殿行禮○辛亥諭孫家鼐奏舉人梁啟超恭擬譯書局章程並瀝陳開辦情形據呈代奏一摺譯
書局事務前經派令梁啟超辦理現在京師設立大學堂爲各國觀聽所係應需功課書籍尤應速行編
譯以便誦習該舉人所擬章程十條均尙切實卽著依議行此事創辦伊始應先爲經久之計必須覓籌
經費方不至草率遷就致貽規模現在購辦機器及中外書籍所費不貲所請開辦經費銀一萬兩俾得

措儉裕如其常年款項亦應寬爲核計著於原定每月經費一千兩外再行增給每月二千兩以備傳選通才益宏搜討以上各款均由戶部卽行籌撥自七月初一日起每月應領經費並著預先發給毋稍稽延其大學堂及時務官報局亟應迅速開辦所需經費如有不敷准由孫家鼐一併隨時具奏至大學堂借撥公所迭經諭令內務府週日修葺移交著趕緊督催先將辦理情形卽日覆奏國家昌明政教不惜多發帑金該大臣等務當督飭在事人員認真籌辦務令經費紓有餘裕庶幾茂矩宏規推之擴廣用副朝廷實事求是至意